

欽定宋史

卷三百
三之八

宋史卷三百三

元中書右丞相總裁脫脫等修

列傳第六十二

張昱之

魏瓘 弟琰

滕宗諒 劉越附

李防

趙湘

唐肅 子詢

張述

黃震

胡頎之

陳貫

子安石
范祥 子育

田京

張昱之字景山父秘自有傳昱之進士及第補樂清尉
潤州觀察推官校勘館閣書籍遷集賢校理通判常州
知温州蔡齊薦其材可用擢提點淮南路刑獄楊崇勳

知亳州恃恩爲不法誣蒙城知縣王申罪械送獄晷之廉得寃狀乃出申配姦吏若干人徙廣南東路轉運使夷人有犯其會長得自治而多慘酷請一以漢法從事權度支判官爲京西轉運使加直史館徙河北被邊諸州發卒斬西山木卒逃入契丹者歲數百人敵旣利其所開地又得亡卒故不爭晷之戒斬伐毋得深入北地卒亦不敢逃還爲鹽鐵副使擢天章閣待制河北都轉運按察使保州廣信安肅軍自五代以來別領兵萬人號緣邊都巡檢司亦曰策先鋒以知州軍爲使置副二人分所領卒爲三部使援隣道太祖嘗用之有功詔每

出巡別給糧錢以優之其後州將不復出內侍爲副數
出巡部卒偏得廩賜軍中以爲不均通判保州石待舉
言於昱之請合三部兵更出入季一出卽別給錢糧餘
悉罷仍請以武臣代內侍時楊懷敏方任邊事尤不悅
巡檢司雲翼卒惡石待舉遂殺之以作亂昱之自魏馳
至城下召諸將部分攻城使人請懷敏曰不卽來當以
軍法從事旣至又以兵自衛昱之曰諸將方集獨敢以
兵隨將欲反邪叱去衛者城開田况潛殺降兵數百人
昱之預知其謀除戶部副使旣而坐前事奪職知虢州
王則反貝州有言昱之在河北捕得妖人李教不殺使

得逸去今乃爲則主謀事平無其人會冀州人段得政
詣闕自言嘗爲叔父屯田郎中曇賊免緣坐且言曇以
書屬昱之乃下御史按劾雖不得書猶奪三官監鄂州
稅知漢陽軍稍遷刑部郎中復待制知湖州徙揚州以
光祿卿致仕卒昱之喜吏事所至有聲退居築家廟率
子弟歲時奉祠

魏瓘字用之父羽奏補秘書省校書郎監廣積倉知開
封府倉曹參軍持法精審明吏事上元起綵山闕前張
燈與宦者護作宦者挾氣視瓘年少輒誅索侵擾瓘密
以聞詔杖宦者遣之瓘門人魏綱上疏詆天書流海島

瓘亦坐是停官復監鄧州稅鄂州茶以大理寺丞知衡
山縣通判壽州歷知循隨安州提點廣南西路刑獄邕
州獠戶緣逋負沒婦女爲傭者一千餘人悉奏還其家
就除轉運使劉鋹時計口以稅雖舟居皆不免至是而
雷化欽廉高州猶未除瓘爲除之減柳州無名役四百
人召權度支判官尋以罪降知洪州徙梓州路轉運使
還知蔡州潭州爲京西轉運使江淮制置發運使自主
客郎中遷太常少卿知廣州築州城環五里疏東江門
鑿東西澳爲水閘以時啓閉焉拜右諫議大夫再任臨
江軍判官史沆性險詖嘗爲瓘所劾免會廣州封送貢

餘椰子煎等餉京師輒邀留之飛奏指以爲珍貨詔遣
內侍發驗無有沈坐不實廢瓘亦降知鄂州未踰年復
爲陝西轉運使徙河北以給事中知開封府政事嚴明
吏民憚之內東門索命婦車得賂遺掖庭物付府驗治
獄未上內降釋罪諫官吳奎言法當執奏而瓘不卽奏
行請以廢法論降知越州儂智高寇廣東西獨廣州城
堅守不能下於是論築城功遷工部侍郎集賢院學士
復知廣州兼廣東經畧安撫使給禁卒五千聽以便宜
從事屬狄青已破賊召還糾察在京刑獄議者請開六
塔河塞商胡北流宰相主其說命瓘按視還奏以爲不

可塞下溪州蠻彭士義叛將發兵討除進龍圖閣直學
士知荆南瓘以爲五溪之險師行鳥道諸將貪功生事
於國家何所利因條上三策以招徠爲上守禦爲下攻
取爲失不報後卒如瓘議徙澶州滑州又徙鄧州不行
請老以吏部侍郎致仕卒瓘所至整辦與人置對未嘗
屈史沆王達以善訟名天下瓘旣廢沆又嘗奏抵達罪
專任機數不稱循吏弟琰

琰字子浩以父恩授秘書省正字爲吏強敏名齊于瓘
嘗通判陳州適歲饑百姓相率強取人粟坐死者甚衆
琰曰此迫於窮餓豈得已者坐其首黥之歷知壽潤滁

安州壽州盜殺寺童子有司執僧答服琰憫其非罪命脫械縱去一府爭以爲不可後數日得真盜富人犯法當死而死獄中琰曰是嘗欺匿異籍孤弱者財所以自斃覲不可窮治爾其吏受賕而爲之謀乎後有告者如琰所料累官司農卿知福州徙廣州以疾告得知江寧府晚昏眊縱私人亂法日答扑無罪吏卒監司劾奏召判刑部仍致仕進衛尉卿卒

滕宗諒字子京河南人與范仲淹同年舉進士其後仲淹稱其才乃以秦州軍事推官召試學士院改大理寺丞知當塗邵武二縣遷殿中丞代還會禁中火詔劾火

所從起宗諒與秘書丞劉越皆上疏諫宗諒曰伏見掖
庭遺燼延熾宮闈雖沿人事實繫天時詔書亟下引咎
滌瑕中外莫不感動然而詔獄未釋鞠訊尚嚴恐違上
天垂戒之意累兩宮好生之德且婦人柔弱箠楚之下
何求不可萬一懷寃足累和氣祥符中宮掖火先帝嘗
索其類寘之法矣若防患以刑而止豈復有今日之虞
哉况變警之來近在禁掖誠願修政以禳之思患以防
之凡逮繫者特從原免庶災變可銷而福祥來格也疏
奏仁宗爲罷詔獄時章獻太后猶臨朝宗諒言國家以
火德王天下火失其性由政失其本因請太后還政而

越亦上疏太后崩擢嘗言還政者越已卒贈右司諫而除宗諒左正言

劉越者字子長大名人少孤貧有學行亦宗諒同年進士嘗知襄城固始二縣有能名既贈官又官其一子賜其家錢十萬宗諒後遷左司諫坐言宮禁事不實降尚書祠部員外郎知信州與范諷雅相善及諷貶宗諒降監池州酒久之通判江寧府徙知湖州元昊反除刑部員外郎直集賢院知涇州葛懷敏軍敗於定州諸郡震恐宗諒顧城中兵少乃集農民數千戎服乘城又募勇敢諜知寇遠近及其形勢檄報旁郡使爲備會范仲淹

自環慶引蕃漢兵來援時天陰晦十餘日人情憂沮宗諒乃大設牛酒迎犒士卒又籍定州戰沒者於佛寺祭酌之厚撫其孥使各得所於是邊民稍安仲淹薦以自代擢天章閣待制徙慶州上言朝廷旣授范仲淹韓琦四路馬步軍都總管經畧安撫招討使而諸路亦帶招討稱號非所宜詔罷之御史梁堅劾奏宗諒前在涇州費公錢十六萬貫及遣中使檢視乃始至部日以故事犒賚諸部屬羌又間以饋遺遊士故人宗諒恐連逮者衆因焚其籍以滅姓名仲淹時參知政事力救之止降一官知虢州御史中丞王拱辰論奏不已復徙岳州稍

遷蘇州卒宗諒尚氣倜儻自任好施與及卒無餘財所
蒞州喜建學而湖州最盛學者傾江淮間有諫疏二十
餘篇

李防字智周大名內黃人舉進士爲莫州軍事推官隨
曹彬入契丹授忠武軍節度推官括磁相二州逃戶田
增租賦十餘萬因請均定田稅又請縣有破逃五十戶
者令佐降下考百戶殿三選二百戶停所居官能招攜
者旌賞之改秘書省著作佐郎通判潞州遷秘書丞體
量二浙民饑建言逃戶田宜卽召人耕種使人不敢輕
去畊畝而官賦常在又請京師置折中倉聽人入粟以

江浙荆湖物價之擢開封府推官請與判官間三五日
卽府司軍巡院察冤獄出爲陝路轉運副使先是沿江
水遞歲役民丁甚衆頗廢農作防悉以城卒代之會分
川陝爲四路徙防梓州路轉運使累遷尚書工部員外
郎爲三司戶部判官景德初江南旱詔與張知白分東
西路安撫上言秦義嘗增江淮兩浙荆湖權酷錢民頗
煩擾江南以歲饑權罷而淮南荆湖未被德音詔悉罷
之仍詔義等毋得復增權酷之利遂爲江南轉運淮南
舊不禁鹽制置司請禁鹽而官自鬻之使兵夫輦載江
上且多漂失之患防請令商人入錢帛京師或輸芻糧

西北邊而給以鹽則公私皆利後采用之徙知應天府
鑿府西障口爲斗門洩汴水淤旁田數百畝民甚利之
又徙興元府入爲三司鹽鐵判官失舉免官後起通判
河南府徙知宿延亳三州爲利州路轉運使累遷兵部
郎中糾察刑獄擢右諫議大夫知永興軍進給事中復
知延州更耀潞二州卒防好建明利害所至必有論奏
朝廷頗施行之其精力過人防在江南晏殊以童子謁
見防命賦詩使還薦之後至宰相

趙湘字巨源華州人進士甲科歷彰武永興昭武三軍
節度推官遷秘書省著作佐郎知新繁縣以吏最命知

商州徙隴州興元府再遷太常博士上補政忠言十篇
召判宗正寺賜白金二百兩久之上書言元德李太后
母育聖躬請祔太宗廟室後用其說冊趙德明假尚書
禮部員外郎爲官告副使擢殿中侍御史權判三司勾
院上言漢章帝以月令冬至之後有順陽助生之文而
無鞠獄斷刑之政遂定令毋以十一月十二月報囚今
季冬誕聖之月而決大辟不廢願詔有司自仲冬留大
辟弗決俟孟春臨軒閱視情可矜惻者貸之他論如法
真宗曰此固善矣然慮繫囚益淹久吏或因緣爲姦爾
湘又上書請封禪未幾命管勾南宮北宅事東封泰山

爲東京留守推官禮成遷侍御史昇州火命湘往致祠
兼問民疾苦還言轉運使劉炤弛職不按部知洪州馬
景病不任事皆罷黜之糾察刑獄改尚書刑部員外郎
兼侍御史知雜事湘又言舊制文武常參官日趨朝並
赴待漏院俟禁門闢今則辰漏上始放外朝故朝者多
後時乃入望敕正衙門主者察晚至以懲其慢若風雨
寒暑託病不朝者罪之時帝親製五箴以自儆湘因言
宗室風化所本宜有以訓厲願特製銘以賜南北邸帝
悅爲製宗室座右銘賜寧王元偓以下并及湘且諭之
曰卿宗姓也故賜卿祀汾陰爲考制度副使請如周官

置土訓錄所過州縣山川與俗好惡日上奏御兼判宗
正寺歷三司戶部度支副使祀太清宮管勾留司三司
事爲鹽鐵副使再遷工部郎中直昭文館出知河南府
徙河中府爲京西轉運使又徙鳳翔府延州遷太常少
卿知襄州又知應天府進右諫議大夫復知河南爲集
賢院學士以疾徙虢州卒

唐肅字叔元杭州錢塘人當錢俶時始七歲能誦五經
名聞其國中後與孫何丁謂曹商游學者慕之舉進士
調郿縣主簿徙秦州司理參軍有商人寓逆旅而同宿
者殺人亡去商人夜聞人聲往視之血沾商人衣爲捕

吏所執州趣獄具肅探知其寃持之後數日得殺人者
後守雷有終就辟爲觀察推官遷秘書省著作佐郎歷
知聞喜福昌縣通判陝州召拜監察御史或薦肅爲羣
牧判官真宗曰朕欲別用肅遂提點梓州路刑獄遷殿
中侍御史入爲三司戶部判官出知舒州遷侍御史爲
福建路轉運使判三司開拆司再遷工部郎中知洪州
尋爲江南東路轉運使擢三司度支副使奉使契丹還
遷刑部爲龍圖閣待制登聞檢院知審刑院卒子詢
詢字彥猷以父任爲將作監主簿天聖中詔許天下士
獻文章應詔者百數有司第其善者詢數人而已詔賜

進士及第知長興縣後以太常博士知歸州用翰林學士吳育薦爲御史未至喪母服除育方參政事宰相賈昌朝與詢有親嫌育數與昌朝言詢用故事當罷御史昌朝欲留詢不得已以知廬州凡官外徙者皆放朝辭而詢獨不用比入見中丞張方平乃奏留詢育爭不能得詢由是怨育而附昌朝昌朝雅不善育詢希其旨上奏曰賢良方正直言極諫茂才異等科漢唐皆不常置若天見災異政有關失則詔在位薦之不可與進士同時設科若因災異非時舉擢宜如漢故事親策當世要務罷秘閣之試育亦奏言三代以來取士之盛莫如漢

唐漢詔舉賢良文學直言極諫之士非有災異而舉唐制科之盛固不專於災異也况災異之出或彌年所無則此舉奚設或頻歲而有則於事太煩令禮部進士數年一舉因以制科隨之則事與時宜又從而更張之使遺材絕望非所以廣賢路也仁宗是育言詔禮部自今制科隨進士貢舉其著爲令時育由制科進帝以爲得人故詢力肆排詆意在育不在制科也育弟婦故駙馬都尉李遵勗妹有六子而寡詢又奏育弟婦久寡不使更嫁欲用此附李氏自進後詢終以故事罷御史除尚書工部員外郎直史館知湖州徙江西轉運使會詔准

南江浙荆湖六路轉運司移文發運使如所屬詢爭以爲不可乃移福建路還爲三司戶部判官又判磨勘司出爲江東轉運使上言執政純取科名顯者修起居注非故事未幾起居注闕人帝特用詢遂知制誥以參知政事曾公亮親嫌出知蘇州徙杭青二州進翰林侍讀學士累遷右諫議大夫召還勾當三班院判太常寺進給事中卒贈禮部侍郎有集三十卷詢少刻勵自修己而不固所守及知湖州悅官妓取以爲妾好畜硯客至輒出而玩之有硯錄三卷子垞附王安石爲監察御史裏行自有傳

論曰宋承平日久吏多以嚴刻爲治晷之辨寃獄配姦吏瓘奏還婦女爲傭者若干人琰吏事不下於瓘脫械縱囚審知姦弊何其明且決也宗諒劉越以孤生立朝請太后還政越年不逮用聲名與宗諒同矣防請罷權酷興水利湘廉問疾苦按不稱職者肅明於獄訟皆不多見也然晷之以殺降而奪官瓘以能置對而興謗詢傳會喜進竊非其據雖列侍從君子所不與也

張述字紹明遂州小溪人舉進士調咸陽縣主簿改大理寺丞遷太常博士皇祐中仁宗未有嗣述上書曰生民之命繫於宗廟社稷而繼嗣爲之本匹夫有百金之

產猶能定謀託後事出于素况有天下者哉陛下承三
聖之業傳之千萬年斯爲孝矣宗廟社稷未有託焉此
臣所以夙夜彷徨而爲陛下憂也謂宜慎擇宗親才而
賢者異其禮秩試以職務俾內外知聖心有所屬則天
下大幸至和元年復上疏曰臣聞明兩作離大人以繼
明照四方離爲日君象也二明相繼故能久照東昇西
沒晝夜迭運數之常也陛下御天下且三紀矣是日之
正中也而未聞以繼照爲慮臣竊疑之歷觀前世或令
出宮闈或謀起閹寺或姦臣首議利幼主以專政假後
宮以盜權安危之機發於頃刻朝議恬然曾不爲計此

臣拳拳爲陛下言也述前後七上疏最後語尤激仁宗終不以爲罪述慷慨喜論事歷通判延州知泗州皆有政跡後以尚書職方員外郎爲江浙荆湖福建廣南路提點坑冶鐵錢事行至萬州道病卒

黃震字伯起建州浦城人進士及第累遷著作佐郎通判遂州嘗給兩川軍士緡錢詔至西川而東川獨不及軍士謀爲變震白主者曰朝廷豈忘東川邪殆詔書稽留爾卽開州帑給錢如西川衆乃定明日詔至累遷尚書都官員外郎提點湖北路刑獄還判三司磨勘司擢江淮發運使先是李溥自三司小吏爲發運使十餘年

姦賊狼藉丁謂黨之無敢言者震將行上書自陳辭頗憤激真宗知其意在溥也諭之曰卿當與人和震對曰廉正公忠臣職也負陛下任使者臣不敢與之和既至發溥姦賊數十事溥坐廢而震亦爲溥訟奪一官罷畏謂權不敢自直及謂貶乃復官知饒州徙廣東轉運使廣南歲進異花數千本至都下枯死者十八九道路苦其煩擾震奏罷之震在真宗朝數論事既卒詔進其官一等

胡順之字孝先原州臨涇人登進士第試秘書省校書郎知休寧縣民有汪姓者豪橫縣不能制歲租賦常不

入適以訟逮捕不肯出順之曰令不行何以爲政命積薪環而焚之豪大駭少長趨出叩頭伏辜推其長械送州致之法爲青州從事高麗入貢中貴人挾以爲重使州官旅拜於郊順之曰青大鎮也在唐押新羅渤海柰何卑屈如此獨不拜大姓麻士瑤陰結貴侍匿兵械服用擬尚方親黨僕使甚多州縣被陵蔑莫敢發其姦會士瑤殺兄子溫裕其母訴于州衆相視曰孰敢往捕者順之持檄徑去盡得其黨有詔鞠問士瑤論死其子弟坐流放者百餘人改著作佐郎知常熟縣遷秘書丞分司南京仁宗卽位遷太常博士天聖明道間再上宰相

書乞太后還政宰相匿不以聞太后崩順之附疾置自言求其書出宰相家仁宗嘉其忠特遷尚書屯田員外郎其後數論朝廷事仲淹愛其才然挾術尚權喜縱橫捭闔以目失明廢州里皆憚焉

陳貫字仲通其先相州安陽人後葬其父河陽因家焉少倜儻數上疏言邊事舉進士真宗識貫名擢真高第爲臨安縣主簿以秘書省著作佐郎爲刑部詳覆官改秘書丞爲審刑院詳議官歷知衛州涇州督察盜賊禁戢不肖子弟簿書筦庫賦租出入皆自檢覈嘗謂僚屬曰視縣官物如已物容有姦乎州人憚其嚴擢利州路

轉運使歲饑出職田粟賑饑者又帥富民令計口占粟
悉發其餘徙陝西累遷尚書度支員外郎入爲三司鹽
鐵判官領河北轉運使請疏徐鮑曹易四水興屯田徙
河東歷三司戶部鹽鐵副使以刑部郎中直昭文館知
相州還朝卒貫喜言兵咸平中大將楊瓊王榮喪師而
歸貫上書曰前日不斬傅潛張昭允使瓊輩畏死不畏
法請自今合戰而奔者主校皆斬大將戰死裨校無傷
而還與奔軍同軍劔城圍別部力足救而不至者以逗
留論真宗嘉納之又嘗上形勢選將練兵論三篇大畧
言地有六害今北邊旣失古北之險然自威虜城東距

海三百里沮澤磽确所謂天設地造非敵所能輕入由
威虜西極狼山不百里地廣平利馳突此必爭之地凡
爭地之利先居則佚後起則勞宜有以待之昔李漢超
守瀛州契丹不敢視關南尺寸地今將帥大抵用恩澤
進雖謹重可信卒與敵遇方畧何從而出邪故敵勢益
張兵折於外者二十年方國家收天下材勇以備禁旅
賴廩給賜予而已恬于休息久不識戰可以衛京師不
可以戍邊境請募土人隸本軍籍丁民爲府兵使北捍
契丹西捍夏人敵之情僞地勢之險易彼皆素知可不
戰而屈人之兵矣後以疾卒著兵畧世頗稱之子安石

安石字子堅以蔭鎖廳及第嘉祐中爲夔峽轉運判官民蓄蠱毒殺人捕誅其魁并得良藥圖由是遇毒者得不死提點陝西刑獄攝帥鄜延能用謀者敵動靜輒先聞嘗敕邊民戒嚴旣而數萬騎奄至無所獲而去璽書嘉之歷使京西河東淮南京東知蘇州邠州河中府戶部副使韓絳鎮太原議行鹽法與監司多不合加安石集賢殿修撰爲河東都轉運使議始定謂其僚曰興事當有漸急則擾乃出鹽付民而俾之券使隨所得貿易鬻畢而歸券私販爲減進天章閣待制官軍西征時遣縣令佐督餉安石謂文吏畏怯武人邀功乃但取敢行

者申約束以防衆潰曰事不豫警侯其犯而誅之是罔民也王中正帥東師而西報安石持四十日糧而師駐白草平彌月安石深念曰吾頓兵益久而秦甲未至倘不足於食將以乏軍興罪我卽擅發民再餉乃以聞李舜舉劾其專詔置獄於潞安石自麟州會逮俄而他路餽糧多不繼神宗察其無罪赦之尚書省初建召爲戶部侍郎嘗與右曹李定同奏事帝目留之曰卿豈非在淮南日不肯保李定持服者乎對曰詔問臣臣不敢不以實奏帝曰以實事君朕所與也進吏部侍郎選人將改京官須次久臨當引對率困於刑寺審問或沮以微

文則一跌不復安石請罷再問以絕曩弊遂爲後法出
知永興軍鄧襄陳鄭州河陽至龍圖閣直學士紹聖元
年卒年八十一

范祥字晉公邠州三水人進士及第自乾州推官稍遷
殿中丞通判鎮戎軍元昊圍城急祥帥將士拒退之請
築劉璠堡定川砦從之歷知慶汝華三州提舉陝西銀
銅坑冶鑄錢祥曉達財利建議變鹽法後人不敢易稍
加損益人輒不便語在食貨志提點本路刑獄制置解
鹽累遷度支員外郎權轉運副使古渭州距秦州三百
里道經啞兒峽邊城數請城之朝廷以餽餉之艱不許

祥權領州事驟請修築未報輒自興役蕃部驚擾青唐族羗攻破廣吳嶺堡圍啞兒峽砦官軍戰死者千餘人坐削一官知唐州後復官提舉陝西緣邊青白鹽改制置解鹽使卒嘉祐中包拯言祥通陝西鹽法行之十年歲減榷貨務使緝錢數百萬其勞可錄官其子孫景郊社齋郎熙寧中平洮岷疊宕河州數千里置郡縣以古渭爲通遠軍權陝西轉運副使張誥奏朝廷復洮隴故地自將帥至禪佐悉有功賞臣見洮渭父老言皇祐中轉運使祥因熟羗數被寇掠其部族願輸土置城以爲守禦乃卽古渭爲砦祥此舉足以消沮邊隙可謂知攻

守之利矣兵出少挫身黜謀廢臣竊悲之冀推原舊功少賜褒卹使天下知祥死猶被恩且舒祥忠義之氣詔贈秘書錄一子未官者子育

育字巽之舉進士爲涇陽令以養親謁歸從張載學有薦之者召見授崇文校書監察御史裏行神宗喻之曰書稱聖讒說殄行此朕任御史之意也育請用大學誠意正心以治天下國家因薦載等數人西夏入環慶詔育行邊還言寶元康定間王師與夏人三大戰而三北今再舉亦然豈中國之大不足以支夏人數郡乎由不察彼已妄舉而驟用之爾昨荔原之役夏人聲言我自

修壘不與漢爭三犯之然後掩殺雖追奔亦不至境由是觀之其情大可見矣又使河東諭韓絳築囉兀二砦始調外郡稍遠邊城前後三十萬夫遼州最爲窮僻然猶上戶配夫四百三十四儼直計三千緡下者十六人其直十萬輦運所經二十二驛宣撫司不先告期轉運使臨時督辦致民皆破產上下莫敢言獨遼守李宏能約民力所勝而餽不失期顧以訴其實翻令鞫罪願貸被劾官吏其芻糧在道者隨所至受之使已困之民咸蒙德澤神宗皆從之坐劾李定親喪匿服罷御史檢正中書戶房固辭乃知韓城縣詔往鄜延議畫地界育言

保疆不如持約持約不如敦信前日疆場嘗嚴矣一旦
約敗兵拏鬪者跌於前耕者侵於後是封溝不足恃也
使人左去而兵革右興金繒朝委而烽烟夕舉是持約
不足恃也今我見利而加兵當講好之後復自立界不
亦愧乎安南行營郭遠趙嵩以兵十萬伐交趾行及長
沙病死相屬遠嵩又不輯睦育疏其不便不從久之知
河中府加直集賢院徙鳳翔以直龍圖閣鎮秦州元祐
初召爲太常少卿改光祿卿樞密都承旨劉安世暴其
閨門不肅出知熙州時又議棄質孤勝如兩堡育爭之
曰熙河以蘭州爲要塞此兩堡者蘭州之蔽也棄之則

蘭州危蘭州危則熙河有腰膂之憂矣又請城李諾平
汝遮川曰此趙充國屯田古榆塞之地也不報入爲給
事中戶部侍郎卒高宗紹興中採其抗論棄地及進築
之策贈寶文閣學士

田京字簡之世居滄州其後徙亳州鹿邑舉進士調蜀
州司法參軍自秦州觀察推官改秘書省著作佐郎爲
大理寺詳斷官趙元昊反侍讀學士李仲容薦京知兵
法召試中書擢通判鎮戎軍夏守贇爲陝西經畧使奏
兼管勾隨軍糧料入對陳方畧賜五品服尋爲經畧安
撫判官守贇旣罷以武畧應運籌決勝科及試秘閣與

他科偕試六論京自以記誦非所長引去又參夏竦軍
事會遣翰林學士晁宗慤卽軍中問攻守孰便衆欲大
舉入討京曰夏人之不道久矣未易破也今欲驅不習
之師深入敵境與之角勝負此兵家所忌師出必敗或
曰不如講和京曰敵兵未嘗挫安肯降我哉未幾元昊
使黃延德叩延州乞降以奇兵出原渭敗大將任福夏
竦素不悅京坐是改通判廬州徙知邵武軍提點河北
路刑獄事乃上言請擇要官守滄衛繫西山石曰廢道
以限戎馬義勇聚教復給糧置卒守烽燧用奇正法訓
兵徙戰馬內地以息邊費凡十餘事仁宗頗嘉納之入

爲開封府判官坐械囚送獄道死出知蔡州徙相邢二
州復提點河北刑獄事王則據恩州反京縋城趣南關
入驍健營撫士卒保州振武兵焚民居欲應賊京捕斬
之乃定賊遣其黨崔象僞出降京以其持妖言惑衆又
斬以徇由是營兵二十六指揮在外者皆懾服不敢叛
州之南關民衆多如城中得不陷賊京有功焉京督士
攻城甚力賊係京妻子乘城迫使呼曰毋亟攻城中將
屠我輩矣京叱諸軍益進攻注矢仰射殺其家四人賊
知京無所顧乃牽妻子去恩州平以不能預察賊降監
鄆州稅先是駐泊都監田斌亦以賊發不能捕待罪兵

間及城破從諸將入以功遷宮苑副使而京獨被謫御史言失察賊過輕忘家爲國義獨重不宜左遷乃徙通判兗州又徙知江陰軍知密州歷提點淮南刑獄事京西轉運使累遷兵部員外郎直史館知滄州轉運使京能招輯流民爲之給田除稅租凡增戶萬七千特遷工部郎中然傳者謂流民之數多不實又強爲人田非其所樂侵民稅地倣古屯田法其後法不成所給種錢牛價民多不償鞭笞督責至累年不能平公私皆患之擢天章閣待制陝西都轉運使改兵部郎中復知滄州拜右諫議大夫卒京喜論議然語繁而迂頗通兵戰歷筭

雜家之術爲人尚氣節少時與常山董士廉汾陰郭京相友善俱以倜儻聞著天人流術通儒子十數書又有奏議十卷

論曰人臣之職當奮不顧身而庸人怯夫於國事則噤而不言若胡越肥瘠之不相干如張述者其亦忠且果矣黃震指李溥忤權臣胡順之擊強宗爲衆人所不敢爲陳貫論兵事范祥畫邊計皆一時雋士妖盜竊發京出孤力保城南置妻孥之憂先登示賊其勇蓋可壯也

宋史卷三百三十一

宋史卷二百四

元中書右丞相總裁脫脫等修

列傳第六十三

周渭

梁鼎

范正辭

子

劉師道

王濟

方偕

曹穎叔

劉元瑜

楊告

趙及

劉湜

王彬

仲簡

周渭字得臣昭州恭城人幼孤養于諸父力學工爲詩
劉鋹據五嶺昭州皆其地也政繁賦重民不聊生渭率
鄉人六百踰嶺將避地零陵未至賊起斷道絕糧復還

恭城則廬舍煨燼遂奔道州爲盜所襲涓脫身北上建
隆初至京師爲薛居正所禮上書言時務召試賜同進
士出身解褐白馬主簿縣大吏犯法涓卽斬之上奇其
才擢右贊善大夫時魏帥符彥卿專恣朝廷選常參官
強幹者莅其屬邑以涓知永濟縣彥卿郊迎涓揖于馬
上就館始與相見畧不降屈縣有盜傷人而逸涓捕獲
并暴廢匿者按誅之不以送府乾德中通判興州州領
且口砦多戍兵監軍教很縱其下爲暴居人苦之涓馳
往諭以禍福斬其軍校衆皆懾服詔書嘉獎命兼本砦
鈐轄開寶元年鳳州七房冶主吏盜隱宮銀擇涓往代

周歲羨課數倍賜緋魚又遷知棣州殿直傅延翰爲監軍謀作亂走契丹爲部下所告涓擒之以聞命械至闕下鞠得實斬於西市涓在郡以簡肅稱及還吏民遮道泣留俄詔賜錢百萬太平興國二年爲廣南諸州轉運副使初涓之入中原妻子留恭城開寶三年平廣南詔昭州訪求賜錢米存卹之及是涓始還故里鄉人以爲榮涓奏去劉鋹時稅筭之繁者重定田賦興學校遷殿中丞屬有事交趾主將逗撓無功有二敗卒擐甲先至邕州中奪民錢涓捕斬之後至者悉令解甲以入訖無敢犯移書交趾諭朝廷威信將刻日再舉黎桓懼卽遣

使入貢就加監察御史在嶺南凡六年徙知揚州進殿
中侍御史改兩浙東西路轉運使入爲鹽鐵判官遷侍
御史歷判戶部度支二勾院出知亳州賜金紫俄授宋
州加職方員外郎爲益州轉運使坐從子違詔市馬黜
爲彰信軍節度副使咸平二年真宗聞其清節召還將
復用詔下而卒年七十七上閔其貧不克葬賻錢十萬
以其子建中爲乘氏主簿渭妻莫荃賢婦人也渭北走
時不暇與荃訣二子孩幼荃尚少父母欲嫁之荃泣誓
曰渭非久困者今違難遠適必能自奮於是親蠶績確
春以給朝夕二子皆畢婚娶凡二十六年復見渭時人

異之朱昂著莫節婦傳紀其事

梁鼎字凝正益州華陽人祖鉞仕蜀爲劔門關使父文獻乘氏令鼎太平興國八年進士甲科解褐大理評事知秭歸縣再遷著作佐郎端拱初獻聖德徽號頌萬餘言試文遷殿中丞通判歙州以能聲聞有詔嘉獎徙知吉州民有蕭甲者豪猾爲民患鼎暴其凶狀杖脊黥面徙遠郡太宗尤賞其強幹代還賜緋魚舊例當給銀寶瓶帶太宗特以犀帶賜之記其名於御屏淳化中上言曰書云三載考績三考黜陟幽明此乃堯舜氏所以得賢人治天下也三代而下典章尚存兩漢以還沿革可

見至於唐室此道尤精有考功之司明考課之令下自簿尉上至宰臣皆歲計功過較定優劣故人思激厲績効著聞五代兵革相繼禮法陵夷顧惟考課之文祇拘州縣之輩黜陟既異各存實亡且夫今之知州卽古之刺史治狀顯著者朝廷不知方畧蔑聞者任用如故大失勸懲之理寢成苟且之風是致水旱荐臻獄訟填溢欲望天下承平豈可得也伏惟陛下繼二聖之丕圖爲億兆之司牧念百官之未乂思四海之未康特詔有司申明考績之法庶幾官得其人民受其賜矣俄爲開封府判官遷太常博士三司右計判官又爲總計判官會

復三部換度支判官至道初鼎洎陳堯叟建議興三白渠及陳許鄧潁蔡宿亳數州用水利墾田事具食貨志遷都官員外郎江南轉運副使就改起居舍人徙陝西二年五將分道擊李繼遷李繼隆擅出赤檉路無功還奏軍儲失期鼎坐削三任復爲殿中丞領職如故以母老求郡歷知徐密二州真宗踐位復舊官咸平四年遷兵部員外郎知制誥賜金紫時三司督逋負嚴急有久被留繫者命鼎與薛映按籍詳定多所蠲免踰月拜右諫議大夫度支使時西鄙未寧建議陝西禁解池鹽所在官鬻詔從之以鼎爲制置使楊覃爲轉運使張賀副

之又以內殿崇班杜承睿同制置鹽事議者多言邊民
舊食青鹽其價甚賤洎禁青鹽以困賊令商賈入粟運
解鹽於緣邊價直與蕃鹽不相遠故蕃部齎鹽至者不
能貨鬻今若禁解池鹽與內地同價則民必冒禁復市
青鹽乃資盜糧也時劉綜爲陝西轉運使鼎奏罷之綜
歸朝亦密陳其非便鼎旣行卽移文禁止鹽商所在約
束乖當延州劉廷偉慶州鄭惟吉皆不從規畫又鼎奏
運咸陽倉粟以實邊粟已陳腐鼎卽與民俟秋收易新
粟朝廷聞而止之上封章密陳其煩擾者甚衆鼎始謀
多沮遂令林特乘傳與永興張詠會鼎等同議可否於

是依舊通鹽商鼎坐首議改作非是詔罷度支使守本
官未幾丁內艱起復景德初知三班院通進銀臺司兼
門下封駁事出知鳳翔府以居憂哭泣傷目表求判西
京留司御史臺三年卒年五十二賜二子出身鼎偉姿
貌磊落尚氣有介節居官峻厲名稱甚茂好學工篆籀
八分嘗著隱書三卷史論二十篇學古詩五十篇子申
甫吉甫

范正辭字直道齊州人父勞謙獲嘉令正辭治春秋公
羊穀梁登第調補安陽主簿開寶中判入等遷國子監
丞知戎州改著作佐郎代還治逋欠於淄州轉運使稱

其能轉左贊善大夫就知淄州太宗征河東諸州糧多不及期正辭所部長山縣吏張秀督民輸受錢二千卽杖殺之郡中畏服太平興國中改殿中丞通判棣深二州遷國子博士御史中丞劉保勳奏克臺直會有言饒州多滯訟選正辭知州事至則宿繫皆決遣之胥吏坐淹獄停職者六十三人會詔令料州兵送京師有王興者懷土憚行以刃故傷其足正辭斬之興妻詣登聞上訴太宗召見正辭廷辨其事正辭曰東南諸郡饒實繁盛人心易動興敢扇搖苟失控馭則臣無待罪之地矣上壯其敢斷特遷膳部員外郎克江南轉運副使賜

錢五十萬饒州民甘紹者積財鉅萬爲羣盜所掠州捕繫十四人獄具當死正辭按部至引問之囚皆泣下察其非實命徙他所訊鞫旣而民有告羣盜所在者正辭潛召監軍王愿掩捕之愿未至盜遁去正辭卽單騎出郭二十里追及之賊控弦持殤來逼正辭大呼以鞭擊之中賊雙目執之賊自刃不殊餘賊渡江散走追之不獲旁得所棄贓賊尚有餘息正辭卽載歸令醫傅藥創旣愈按其姦狀伏法而前十四人皆得釋端拱二年代歸與洛苑副使綦仁擇西京作坊副使尹宗諤同監折中倉先是令商人輸米豆而以茶鹽酬其直謂之折中

復有言其弊罷之至是復置焉遷倉部員外郎同知慕
府州縣官考課改判刑部歷戶部鹽鐵二判官遷考功
員外郎通判定揚杭三州真宗卽位遷膳部郎中召判
三司勾院俄復爲鹽鐵判官咸平二年出爲河東轉運
使三年以本官兼侍御史知雜事時李昌齡自忠武行
軍起知梓州董儼知壽州王德裔楊緘皆任轉運使後
失官宰畿邑正辭上言昌齡輩貪墨著聞願陛下罷其
民政詔追還儼敕餘悉代之又言治民之官牧宰爲急
舉吳奮等五人堪任大郡復請令奮等各舉知縣縣令
從之坐鞫任懿獄貶滁州團練副使會赦復爲倉部考

功員外郎通判鄆州知淮陽軍復膳部郎中以年老求
監兗州商稅大中祥符三年四月卒年七十五子識諷
並進士及第

諷字補之以蔭補將作監主簿獻東封賦遷太常寺奉
禮郎又獻所爲文召試入等出知平陰縣會河決王陵
埽水去而土肥失阡陌田訟不能決諷分別疆畔著爲
券民持去不復爭諷辨數激昂喜爲名聲然亦操持在
已吏不敢欺爲縣存視貧弱至豪猾大家峻法治之舉
進士第遷大理評事通判淄州歲旱蝗他穀皆不立民
以蝗不食菽猶可藝而患無種諷行縣至鄒平發官廩

貸民縣令爭不可諷曰有責令無預也卽出貸三萬斛
比秋民皆先期而輸徙知梁山軍以母老不行得通判
鄆州時知州李迪貶衡州副使宰相丁謂戒使者持詔
書促上道諷輒留迪數日爲治裝祖行詔塞決河州募
民入芻撻而城邑與農戶等諷曰貧富不同而輕重相
若農民必大困且詔書使度民力今則均取之此有司
悞也卽改符使富人輸三之二因請下諸州以鄆爲率
朝廷從其言徙知廣濟軍民避水堤居凡給徭於官者
諷悉縱使護其家奏除其租賦累遷太常博士以疾監
舒州靈仙觀尚御藥張懷德至觀齋祠諷頗要結之懷

德薦于章獻太后遂召還問所欲言對曰今權臣驕悍將不可制蓋指曹利用也利用貶拜右司諫三司度支判官百官轉對敕近臣閱視其可行者類次以聞諷奏曰非上親覽決可否則誰肯爲陛下極言者玉清昭應宮災下有司治火所起諷曰此天之戒告乃復置獄以窮治之非所以應天也獄由是得解議者疑復修諷上書諫山木已盡人力已竭宮必不成臣知朝廷亦不爲此其如疑天下何宜詔示四方使明知之於是下詔罷修改尚書禮部員外郎兼侍御史知雜事錢惟演自許州來朝圖相位諷奏惟演嘗爲樞密使以皇太后姻屬

罷之示天下以不私固不可復用遂以惟演守河南使
契丹道過幽州北見原野平曠慨然曰此爲戰地不亦
信哉遼人相目不敢對擢天章閣待制知審刑院出知
青州再遷戶部郎中時山東饑宰相王曾青人家積粟
多諷發取數千斛濟饑民因請遣使安撫京東入爲右
諫議大夫權御史中丞又請益漕江淮米百萬自河陽
河陰東下以賑貸之錢惟演倡議獻懿二太后宜耐真
宗廟室諷彈奏之及言其在太后時權寵甚盛且與后
族連姻請絀去仁宗不聽諷袖告身以對曰陛下不聽
臣言臣今奉使山陵而惟演守河南臣早暮憂刺客願

納此不敢復爲御史中丞矣帝不得已可之諷乃趨出
遂貶惟演隨州陳堯佐罷參知政事有王文吉者告堯
佐謀反仁宗遣中官訊問復以屬諷夜中被旨究詰旦
得其誣狀奏之時上章懿皇后諡宰相張士遜樞密使
楊崇勳日中不赴慰班諷彈士遜與崇勳俱罷諷嘗侍
對帝語及郭后亡子諷言亡子大義當廢陰合帝旨以
龍圖閣直學士權三司使時狄棐爲直學士已久諷盛
氣凌棐宰相李迪右之遂特詔班棐上論者非之尋轉
閣學士以疾免三司使改翰林侍讀學士管勾祥源觀
徙會靈觀復改閣學士給事中知兗州旣至郡而隴籍

爲廣南東路轉運使未行上言嚮爲侍御史嘗奏彈諷以三司使曲爲左藏監庫吳守則奏課遷官尚美人同父弟娶守則女諷以銀鞍勒遺守則相結納旣出兗州乃給言貧假翰林白金器數千兩自隨而增產於齊州市官田虧平估置獄于南京劾之諷坐方聽旨擅馳驛還兗州當贖籍所奏有不實當免官宰相呂夷簡嫉諷詭激特貶諷武昌軍節度行軍司馬貸籍止降官知臨江軍由是宰相李迪等坐親善諷皆斥歲中徙保信軍聽居舒州持母喪又許歸齊州日飲酒自縱爲時所譏服除改將作少監知淮陽軍遷光祿卿知陝州道改潞

州入見帝言元昊不可擊獨以兵守要害捍侵掠久當
自服倘內修百度躬節儉如祖宗故事則疆事不足憂
復給事中卒諷嘗建議朝廷當差擇能臣留以代大臣
之不稱職者大臣聞而惡之又數短叅知政事王隨于
帝前因奏外人謂臣逐隨將取其位願先出臣爲陛下
引姦邪去而朝廷清矣又嘗與張士遜議事不合諷曰
世謂大事未易可議小事不足爲所爲終何事邪及爲
龐籍訟人謂大臣陰諷籍焉諷類曠達然捍闔圖進不
守名檢所與游者輒慕其所爲時號東州逸黨山東人
顏太初作逸黨詩刺之而姜潛者又嘗貽書以疏其過

宋史卷三百四十四 列傳
云子寬之終尚書刑部郎中知濠州

劉師道字損之一字宗聖開封東明人父澤右補闕師道雍熙二年舉進士初命和州防禦推官歷保寧鎮海二鎮從事凡十年王化基呂祐之樂史薦于朝擢著作佐郎纔一月會考課又遷殿中丞出知彭州就加監察御史轉運使劉錫馬襄上其治跡召歸會浦洛之敗奉詔劾白守榮輩獄成太宗獎其勤畝賜緋魚川陝豪民多旁戶以小民役屬者爲佃客使之如奴隸家或數十戶凡租調庸歛悉佃客承之時有言李順之亂皆旁戶鳩集請釋旁戶爲三者長迭主之疇歲勞則授以官詔

師道使兩川議其事師道以爲迭使主領則爭忿滋多
署以名級又重增擾害廷奏非便卒罷之改祠部員外
郎出爲京東轉運使真宗嗣位進秩度支咸平初范正
辭薦其材堪長民徙知潤州三年改淮南轉運副使兼
淮南江浙荆湖發運使四年以漕事入奏特遷司封俄
爲正使改工部郎中代查道爲三司度支副使七月擢
樞密直學士掌三班俄擢三司使從幸澶淵判隨駕三
司克都轉運使師道弟幾道舉進士禮部奏名將廷試
近制悉糊名較等陳堯咨當爲考官教幾道於卷中密
爲識號幾道旣擢第事泄詔落其籍永不預舉師道固

宋史卷三百四十一
列傳
十一
求辨理詔曹利用邊肅閭承翰詣御史府推治之坐論
奏誣罔責爲忠武軍行軍司馬堯咨免所居官爲鄆州
團練副使一年以郊祀恩起爲工部郎中知復州換秀
州大中祥符二年以兵部郎中知潭州遷太常少卿師
道敏於吏事所至有聲吏民畏愛長沙當湖嶺都會剖
煩析滯案無留事歲滿復加樞密直學士換左司郎中
留一任七年李應機代還應機未至郡六月師道暴病
卒年五十四錄幾道爲試秘書省校書郎師道性慷慨
尚氣善談世務與人交敦篤工爲詩多與楊億輩酬唱
當時稱之

王濟字巨川其先真定人祖卿有詞辨趙王鎔召置幕府鎔政衰卿懼禍避地深州饒陽遂爲縣人父恕後唐時童子及第開寶中知秀州會盜起城陷爲盜所殺將并害濟濟伏柩號慟謂賊曰吾父已死吾安用生爲但恨力不能殺汝以報父讎爾賊義之捨去濟攜父骨匿山谷間旣而官軍大集濟脫身謁其帥朱乙陳討賊之計乙嘉之遺以束帛奏假驛置遣歸先是濟母終於岳陽權窆佛舍至是乃併護二喪還饒陽州將以聞太祖召見以其尚少且俾就學雍熙中上書自陳死事之孤得試學士院補龍溪主簿時調福建輸鶴翎爲箭羽鶴

非常有物有司督責急一羽至直數百錢民甚苦之濟
諭民取鵝翎代輸仍驛奏其事因詔旁郡悉如濟所陳
縣有陂塘數百頃爲鄉豪幹其利會歲旱濟悉導之分
溉民田汀州以銀冶構訟十年不決逮繫數百人轉運
使使濟鞫之纔七日情得止坐數人再調胙城尉徙臨
河主簿轉運使王嗣宗被詔舉法官以濟名聞遷光祿
寺丞權大理丞改刑部詳覆官通判鎮州牧守多勲舊
武臣倨貴陵下濟未嘗撓屈戍卒頗恣暴不法夜或焚
民舍爲盜一夕報有火濟部壯士數十潛往偵伺果得
數輩并所盜物卽斬之馳奏其事太宗大悅都校孫進

使酒無賴毆折人齒濟不俟奏杖脊送闕下繇是軍城畏肅就遷太子中舍詔書獎勞召判登聞鼓院拜監察御史上疏陳統天下之術節民物之道大者有十擇左右別賢愚正名器去冗食加奉祿謹政教選良將分兵戍修民事開仕進其言切於時詞多不載咸平初濟以刑網尚繁建議請刪定制敕乃命張齊賢領其事濟預焉刑統舊條持仗行劫不以贓有無悉抵死齊賢議貸不得財者濟曰刑期於無刑以死懼之尚不畏况緩其死乎因與齊賢廷爭數四濟詞氣甚厲目齊賢爲腐儒然卒從齊賢議人以濟爲刻改鹽鐵判官車駕巡師大

名調丁夫十五萬修黃什河濟以爲勞民詔濟馳往經度還奏省十六七齊賢時爲相以河決爲憂因對并召濟見齊賢請令濟署狀保河不決濟曰河決亦陰陽災沴宰相苟能和陰陽弭災沴爲國家致太平河之不決臣亦可保齊賢曰若是則今非太平邪濟曰北有契丹西有繼遷兩河關右歲被侵擾以陛下神武英畧苟用得其人可以馴致今則未也上動容獨留濟問邊事濟曰陛下承二聖之基擁百萬之衆蠢茲醜虜敢爾憑陵蓋謀謨當國之人未有如昔之比臣謂國家所恃獨一洪河耳此誠急賢之秋不然臣懼敵人將飲馬於河渚

矣又著備邊策十五條以獻三年選官判大理寺上曰
法寺宜擇當官不回者苟非其人或有寬濫卽感傷和
氣王濟近數言事似有操持可試之遂令濟權判大理
寺事福津尉劉瑩集僧舍屠狗羣飲杖一伶官致死濟
論以大辟遇赦從流時王欽若知審刑與濟素不相得
又以濟嘗忤齊賢乃奏瑩當以德音原釋齊賢王欽若
議濟坐故入停官逾年復爲監察御史通判河南府景
德初徙知河中府契丹南侵上幸澶淵詔緣河斷橋梁
毀船舫稽緩者論以軍法濟曰陝西有關防隔闕舳艫
遠屬軍儲數萬一旦沉之可惜又動搖民心因密奏寢

其事上深嘉歎遣使褒諭未幾召拜工部員外郎兼侍
御史知雜事三年判司農寺時周伯星見濟乘間言曰
昔唐太宗以豐年爲上瑞臣願陛下日慎一日居安慮
危則天下幸甚受詔與劉綜改定茶法頗易舊制由是
忤丁謂林特劉承規輩因與欽若迭詆訾之四年拜本
曹郎中出知杭州上面加慰諭仍戒以朝廷闕失許密
上言遷刑部郎中郡城西有錢塘湖溉田千餘頃歲久
湮塞濟命工濬治增置斗門以備潰溢之患仍以白居
易舊記刻石湖側民頗利之睦州有狂僧突入州廨出
妖言與轉運使陳堯佐按其實斬之上嘉其能斷大中

祥符三年徙知洪州兼江南西路安撫使屬歲旱民饑躬督官吏爲糜粥日親嘗而給之錄饑民爲州兵全活甚衆是歲卒年五十九遺奏大旨以進賢退諛佞罷土木不急之費爲言濟頗涉經史好讀左氏春秋性剛直無所畏避少時深州刺史念金鎖一見器之且託後於濟金鎖沒濟撫其孤援寘祿仕素與內臣裴愈有隙愈坐事上怒甚命憲府鞠之濟適知雜事力爲辨理遂獲輕典子孝傑國子博士

論曰渭有清節臨事多從便文鼎好規畫師道喜論世務正辭按貪吏辨冤獄濟議論挺特無所畏避五臣者

仕不過監司郡守而名稱甚茂可尚哉

方偕字齊古興化莆田人年二十及進士第爲温州軍
事推官歲饑民欲隸軍就廩食州不敢擅募偕乃詣提
點刑獄呂夷簡曰民迫流亡不早募之將聚而爲盜矣
夷簡從之籍爲軍者七千人後遷汀州判官權知建安
縣縣產茶每歲先社日調民數千鼓譟山旁以達陽氣
偕以爲害農奏罷之遷秘書省著作佐郎歷知福清資
陽縣累遷尚書屯田員外郎爲御史臺推直官澧州逃
卒傭民家自給一，誣告民事摩駝神歲殺十二人以
祭州逮其族三百人繫獄久不決偕被詔就劾令卒疏

所殺主名按驗皆亡狀事遂辨卒以誣告論死知雜事
龐籍薦爲御史裏行再遷侍御史南京鴻慶宮災偕引
漢罷原廟故事請勿復脩元昊寇塞門鄜延副總管趙
振逗撓不出棊詔偕往按之法當斬偕奏兵寡不敵苟
出以餌賊無益也振由是得不死爲開封府判官江南
安撫三司歲出乳香綿綺下州郡配民偕奏罷之更鹽
鐵判官遷兵部員外郎兼御史知雜事言以罪謫監當
者監司勿得差權親民官判大理寺改度支副使擢天
章閣待制江淮制置發運使知杭州遷刑部郎中偕以
吏事進治杭州有能聲喜飲酒至酣宴無節數月暴中

風以太常少卿分司西京遷光祿卿卒

曹穎叔字秀之亳州譙人初名熙嘗夢之官府見穎叔名遂更名穎叔進士及第歷威勝軍判官渭州軍事推官御史中丞蔡齊薦爲臺主簿改大理寺丞韓億知亳州辟僉書節度判官事通判儀州韓琦文彥博薦其才徙夔州路轉運判官夔峽尚淫祠人有疾不事醫而專事神穎叔悉禁絕之乃教以醫藥提點陝西路刑獄夏人納款詔與戶部副使夏安期轉運使柳灝減戍卒吏員之冗者爲開封府判官時御史宋禧鞠衛士獄于內侍省禧不能辨及獄具內侍使禧自爲牒穎叔言禧爲

制使辱命請寘之法元昊死爲夏國祭奠使除直史館
知鳳翔府徙益州路轉運使權度支副使儂智高寇嶺
南朝議以閩中久弛兵備擢天章閣待制知福州累遷
右司郎中爲陝西都轉運使自慶曆鑄大鐵錢行陝西
民盜鑄不已三司上權鐵之議穎叔曰鐵錢輕而貨重
不可久行况官自權鐵乎請罷鑄諸郡鐵錢以三鐵錢
當銅錢之一從之兩川和買絹給陝西兵而蜀人苦於
煩歛穎叔爲歲出本路緡錢五十萬以易軍衣之餘者
兩川之民始無擾焉進龍圖閣直學士知永興軍然年
老漸昏耄事頗壅積人或嘲誚之卒于官

劉元瑜字君玉河南人進士及第補舞陽縣主簿改秘書省著作佐郎知雍邱縣通判隰并二州知郢州以太常博士爲監察御史上言考課之法自朝廷至員外郎郎中少卿須清望官下人保任始得遷故浮薄輩日趨權門非所以養廉耻也詔罷之提舉河北便糴會永寧雲翼軍士謀爲變吏窮捕黨與謀劫囚以反百姓竊知多逃避元瑜馳至斬爲首者其餘皆釋去不問歷京西河東轉運使遷右司諫劾奏集賢校理陸經謫官在河南日杖死爭田寡婦且貸民鋤監司列薦其才投託權要遂復館職請重寘於法并坐保薦者詔屬吏遂竄經

袁州又疏李用和曹琮李昭亮不可典軍梁適不當除翰林學士范仲淹以非罪貶既復天章閣待制宜在左右尹洙余靖歐陽脩皆以朋黨斥逐此小人惡直醜正者也既而與靖等相失反言前除夏竦爲樞密使諫臣數人摭其舊過召至都門而罷之自此以進退大臣爲已任激訐陰私爲忠直薦延輕薄列之館閣以唱和爲朋比近除兩府出自聖斷獨黨人以之用不出於已議論紛然臣恐復被疏罷矣前日孫甫薦葉清臣毀丁度效此也因論靖知制誥不宜兼領諫職且奉使契丹對契丹主倣六國語辱國命請加罪脩靖深惡之繇是論

者以元瑜爲奸邪後除三司鹽鐵副使以天章閣待制知潭州徭人數爲寇元瑜使州人楊謂入梅山說酋長四百餘人出聽命因厚犒之籍以爲民凡千二百戶徙桂州固辭降鄧州坐在潭州擅補畫工易元吉爲畫助教降知隨州又失保任改信州徙襄州富人子張銳少孤弱同里車氏規取其財乃取銳父棄妾他姓子養之比長使自訴陰賊吏爲助州斷使歸張氏銳莫敢辨旣同居逾年車卽導令求析居元瑜知窮治得奸狀黥車竄之人伏其明歷河中府以左諫議大夫知青州卒元瑜性貪至竊販禁物親與小人爭權時論鄙之

楊告字道之其先漢州綿竹人父允恭西京左藏庫使
數任事有功既死賜告同學究出身調廬江尉時張景
笞吏死而吏捕急逃歸告懼告不見納告曰君勿憂也
吾死生以之景卒免改豐城主簿邑有賊殺人投屍
江人知主名而畏不敢言告聞親往擒賊有言賊欲報
怨者告不爲動既而果乘夜欲刺告告又捕得致於法
境內肅然再調南劔州判官知南安六合錢塘寧國縣
改大理寺丞通判江寧州盜殺商人鑿舟沉屍江中有
被誣告者笞服獄具告疑其無狀後數日果得真盜徒
知池州累遷尚書司封員外郎開封府推官開拆司爲

趙元昊旌節官告使元昊專席自尊大告徙坐卽賓位莫之屈也除京西轉運副使屬部歲饑所至發公廩又募富室出粟賑之民伐桑易粟不能售告命高其估以給酒官民獲濟者甚衆以疾權管勾西京留臺頃之判三司憑由理欠司爲淮南轉運使徙制置發運使除三司戶部副使更度支安撫河東改鹽鐵副使歷祠部度支司封郎中以少府監復爲制置發運使拜右諫議大夫知鄭州徙江寧府壽州告曉法令頗知財利而不務苛刻時號能吏然喜事權貴以要進一子力學有文數爲近臣薦召試賜同進士出身未幾卒告悲傷之尋卒

趙及字希之其先幽州良鄉人父的事契丹爲蔚州靈
邱令雍熙中王師北征乃歸授偃師令因家焉及舉進
士爲慈州軍事推官徙廣信軍判官改秘書省著作佐
郎知魏縣徙九隴以母老監葉縣稅歷黃河御河催綱
通判青州大名府累遷尚書屯田員外郎被舉爲殿中
侍御史權宗正丞詔劾夏守恩獄內侍岑守中用賄撓
法及劾正其罪遷侍御史夏守贊經略西鄙還及言其
無功不可復樞府又疏罷郭承祐團練使未幾請知懷
州徙徐州還爲三司戶部判官遷兵部員外郎京東轉
運按察使知萊州張周物貪暴及劾奏貶周物嶺外擢

兼侍御史知雜事數論時政權判吏部流內銓初銓吏
匿員闕與選人爲市及奏闕至卽榜之吏部榜闕自及
始遷戶部副使以疾改刑部郎中直昭文館知衛州召
爲鹽鐵副使又以疾請知汝州歲除復召爲副使不赴
徙知河中府特拜天章閣待制右司郎中祀明堂遷右
諫議大夫還判大理寺流內銓出知徐州疾甚求解近
職還州事乃以本官管勾南京留司御史臺未赴卒及
和厚謙退內行尤篤所治有聲民吏愛之

劉湜字子正徐州彭城人舉進士爲澶州觀察推官再
調湖南節度推官改秘書省著作佐郎知益都縣徙陰

平再遷太常博士通判劔州審閬州獄活死囚七人王堯臣安撫陝西薦之擢知耀州富平有盜掠人子女者既就擒陽死伺間逸去捕得復陽死守者以報湜趣焚其屍拜監察御史王德用自隨州詔還近臣言其有反相湜保右之歷開封府推官三司鹽鐵判官遷殿中侍御史上言轉運使倚撫郡縣苛束官吏人不得騁其材宜稍寬假不爲改者繩治之詔詣渭州劾尹洙私用公使錢頗傳致重法以故洙坐廢還爲尚書禮部員外郎兼侍御史知雜事同判吏部流內銓除鹽鐵副使議者謂湜採宰相意深致洙罪故得優擢焉明年宴紫宸殿

副使當坐殿東廡湜不卽坐趣出閣門奏之坐謫知沂州徙兗州又坐沂州誤出囚死罪降知海州起爲河東轉運使遷戶部員外郎復爲鹽鐵副使兼領河渠事汴水絕鑿河陰新渠通漕運如故會江南饑擢天章閣待制知江寧府奏運蘇州米五十萬斛以貸饑民除戶部郎中知廣州儂智高初平湜練土兵葺械器作鐵鎖斷江路有盜據山敕貸罪招之不肯降湜知並山民資之食卽徙民絕餉盜困蹙乞降民安之居二年母老求內徙遂徙徐州湜喜曰昔布衣隨計今以待從官三品復典鄉郡過始望矣又以左司郎中知鄆州遷龍圖閣直

學士知慶州湜少賤毋更嫁營卒既登第具袍笏趨卒舍迎毋里人觀歎然嗜酒持法少恕改知密州以病卒王彬光州固始人祖彥英父仁偁從其族人潮入閩潮有閩土彥英頗用事潮惡其逼陰欲圖之彥英覺之挈家浮海奔新羅新羅長愛其材用之父子相繼執國政彬年十八以賓貢入太學淳化三年進士及第歷雍邱尉皇城司陰遣人下畿縣刺史多厲民令佐至與爲賓主彬至捕鞠之得所受賂致之法自是詔親事官毋得出都城易右班殿直辭不受後以秘書省著作佐郎通判筠州歷知撫州撫州民李甲饒英恃財武斷鄉曲縣

莫能制甲從子晉縣令人告甲語斥乘輿彬按治之索其家得所藏兵械又得服器有龍鳳飾甲坐大逆棄車并按英嘗強取人孥配嶺南州里肅然擢提點荆湖南路刑獄徙知潭州入判三司戶部勾院出爲京西轉運使徙河北部吏馬崇正倚章獻太后姻家豪橫不法彬發其姦贓下吏忤太后意徙京東又徙河東陝西復爲三司鹽鐵判官判都理欠憑由司累遷太常少卿卒

仲簡字畏之揚州江都人以貧傭書楊億門下億教以詩賦遂舉進士歷通判鄭州河南府推官改秘書省著作佐郎知蕪湖縣通判楚州累遷尚書都官員外郎改

侍御史安撫京東遷知真州入爲三司度支判官經制
陝西糧草就遷兵部員外郎直史館知陝州徙江東轉
運使除侍御史知雜事爲三司鹽鐵副使工部郎中奉
使陝西多任喜怒以馬箠擊軍士流血仁宗面詰之不
能對出爲河東轉運使逾年復爲鹽鐵副使再遷兵部
擢天章閣待制知廣州儂智高犯邕州沿江而下人告
急簡輒囚之仍榜于道敢妄言惑衆者斬以是人不復
爲避賊計比智高至始令民入城民爭道競以金帛遺
闔者相蹂踐至死者甚多其不得入者皆附賊賊旣去
以其能守城徙知荆南旣而言者論之遂落職又降刑

部郎中知筠州復爲兵部郎中徙洪州卒

論曰士抱一藝者思奮勵以功名自效况其設施見於政事者乎方偕曹穎叔楊告趙及王彬之流皆文吏能推恩行利剗煩去蠹其治不下古人劉元瑜劉滉輩亦不減此數人然而元瑜譏詆余靖滉文致尹洙公議所不與也仲簡小才所謂斗筭之器也何足道哉

宋史卷三百四

宋史卷三百五

元中書右丞相總裁脫脫等修

列傳第六十四

楊億

弟偉

從子絃

晁迥

子宗慤

劉筠

薛映

楊億字大年建州浦城人祖文逸南唐玉山令億將生文逸夢一道士自稱懷玉山人來謁未幾億生有毛被體長尺餘經月乃落能言母以小經口授隨卽成誦七歲能屬文對客談論有老成風雍熙初年十一太宗聞其名詔江南轉運使張去華就試詞藝送闕下連三日

得對試詩賦五篇下筆立成太宗深加賞異命內侍都知王仁睿送至中書又賦詩一章宰相驚其俊異削章爲賀翌日下制曰汝方髫鬣不由師訓精爽神助文字生知越景絕塵一日千里予有望于汝也卽授秘書省正字特賜袍笏俄丁外艱服除會從祖徽之知許州億往依焉務學晝夜不息徽之間與語歎曰與吾門者在汝矣淳化中詣闕獻文改太常寺奉禮郎仍令讀書秘閣獻二京賦命試翰林賜進士第遷光祿寺丞屬後苑賞花曲宴太宗召命賦詩于坐側又上金明池頌太宗誦其警句于宰相明年三月苑中曲宴億復以詩獻太

宗訝有司不時召宰相言舊制未貼職者不預卽以億直集賢院表求歸鄉里賜錢十五萬至道初太宗親製九絃琴五絃阮文士奏頌者衆獨稱億爲優賜緋魚二年春遷著作佐郎帝知其貧屢有霑賚嘗命爲越王生辰使時公卿表䟽多假文於億名稱益著眞宗在京府徽之爲首僚郎中書䟽悉億草定卽位初超拜左正言詔錢若水脩太宗實錄奏億參預凡八十卷而億獨草五十六卷書成乞外補就養知處州眞宗稱其才長於史學留不遣固請乃許之任郡人周啓明篤學有文深加禮待召還拜左司諫知制誥賜金紫咸平中西鄙未

寧詔近臣議靈州棄守之事億上疏曰臣嘗讀史見漢武北築朔方之郡平津侯諫以爲罷弊中國以奉無用之地願罷之上使辨士朱買臣等發十策以難平津平津不能對臣以爲平津爲賢相非不能折買臣之舌蓋所以將順人君之意爾舊稱朔方地在要荒之外聲教不及元朔中大將軍衛青奮兵掠地列置郡縣今靈州蓋朔方之故墟僻介西鄙數百里間無有水草烽火亭障不相望當其道路不壅饟饋無虞猶足以張大國之威聲爲中原之扞蔽自邊境屢驚兇黨猖熾爵賞之而不恭討罰之而無獲自曹光實白守榮馬紹忠及王榮

之敗資糧屏履所失至多將士丁夫相枕而死以致募
商人輸帛入穀償價數倍孤壤築城邊民繹騷國帑匱
乏不能制邊人之命及濟靈武之急數年之間兇黨逾
盛靈武危堞巋然僅存河外五城繼聞陷沒但堅壁清
野坐食糗糧閉壘枕戈苟度朝夕未嘗出一兵馳一騎
敢與之角此靈武之存無益明矣平津所言罷弊中國
以奉無用之地正今日謂也臣以爲存有大害棄有大
利國家輓粟之勞士卒流離之苦悉皆免焉堯舜禹聖
之盛者也地不過數千里而明德格天四門穆穆武丁
成王商周之明主也然地東不過江黃西不過氐羗南

不過蠻荆北不過太原而頌聲並作號爲至治及秦漢
窮兵拓土肝腦塗地校其功德豈可同年而語哉昔西
漢賈捐之建議棄朱崖當時公卿亦有異論元帝力排
衆說奮乎獨見下詔廢之人頌其德故其詔曰議者以
棄朱崖羞威不行夫通於時變卽憂萬民之饑餓危孰
大焉且宗廟之祭凶年不備况乎避不嫌之辱哉臣以
爲類於靈武也必以失地爲言卽燕薊八州河湟五郡
所失多矣何必此爲臣竊惟太祖命姚內弒領慶州董
遵誨領環州統兵裁五六千悉付以闔外之事士卒効
命疆場晏然朝廷無旰食之憂疆場無羽書之警臣乞

選將臨邊賜給廩賦資以策略許便宜而行倘寇擾內屬撓之以勁兵示之以大信懷荒振遠諭以賞格彼則奔潰衆叛安能與大邦爲敵哉若欲謀成廟堂功在漏刻臣以爲彼衆方黠積財猶豐未可以歲月破也直須棄靈州保環慶然後以計困之爾如臣之策得驍將數人提銳兵一二萬給數縣賦以資所用令分守邊城則寇可就擒而朝廷得以無虞矣景德初以家貧乞典郡江左詔令知通進銀臺司兼門下封駁事時以吏部銓主事前宜黃簿王太冲爲大理評事億以丞吏之賤不宜任清秩卽封詔還未幾太冲補外俄判史館會脩冊

府元龜億與王欽若同總其事其序次體制皆億所定
羣寮分撰篇序詔經億竄定方用之三年召爲翰林學
士又同脩國史凡變例多出億手大中祥符初加兵部
員外郎戶部郎中五年以疾在告遣中使致太醫視之
億拜章謝上作詩批紙尾有副予前席待名賢之句以
久疾求解近職優詔不許但權免朝直億剛介寡合在
書局唯與李繼路振刁衍陳鉞劉筠輩厚善當時文士
咸賴其題品或被貶議者退多怨謗王欽若驟貴億素
薄其人欽若銜之屢挾其失陳彭年方以文史售進忌
億名出其右相與毀訾上素重億皆不惑其說億有別

墅在陽翟億母往視之因得疾請歸省不待報而行上親緘藥劑加金帛以賜億素體羸至是以病聞請解官有嗾憲官劾億不俟命而去授太常少卿分司西京許就所居養療嘗作君可思賦以抒忠憤冊府元龜成進秩秘書監七年病愈起知汝州會加上玉皇聖號表求陪預卽代還以爲叅詳儀制副使知禮儀院判秘閣太常寺天禧二年冬拜工部侍郎明年權同知貢舉坐考較差謬降授秘書監丁內艱屬行郊禮以億典司禮樂未卒哭起復工部侍郎令視事四年復爲翰林學士受詔注釋御集又兼史館脩撰判館事權景靈宮副使十

二月卒年五十七錄其子紘爲太常寺奉禮郎億天性穎悟自幼及終不離翰墨文格雄健才思敏捷略不凝滯對客談笑揮翰不輟精密有規裁善細字起草一幅數千言不加點竄當時學者翕然宗之而博覽強記尤長典章制度時多取正喜誨誘後進以成名者甚衆人有片辭可紀必爲諷誦手集當世之述作爲筆苑時文錄數千篇重交游性耿介尚名節多周給親友故廩祿亦隨而盡留心釋典禪觀之學所著括蒼武夷穎陰韓城退居汝陽蓬山冠輦等集內外制刀筆共一百九十四卷弟偉景德中舉進士得第三等及第以億故升爲

第二等億無子以從子紘爲後弟偉

偉字子奇幼學于億天禧元年獻頌召試學士院賜進士及第以試秘書省校書郎知衢州龍游縣再補蘄州錄事參軍國子監薦爲直講駙馬都尉李遵勗守澶州辟僉書鎮寧軍節度判官事遷大理寺丞知河間縣再遷太常博士用近臣薦爲集賢校理通判單州會巡檢部卒李素合州卒二百餘人謀殺巡檢使入鼓角門州將不敢出偉挺身往問曰若屬何爲而反俱曰將有訴于州非反也偉曰持兵來非反而何若屬皆有父母妻子以一朝忿而欲魚肉之乎悉令投兵坐籍首惡得十

宋史卷三百五 列傳
餘人斬之徙知祥符縣提點開封府界諸縣鎮公事權
開封府判官又判三司開拆司累遷尚書兵部員外郎
同脩起居注偉清慎無治劇才常秉小笏以朝知制誥
缺中書以偉名進仁宗曰此非秉小笏者邪遂命知制
誥權諫院嘗曰諫臣宜陳列大事細故何足論然當時
譏其亡補遷刑部郎中爲翰林學士祀明堂遷右司郎
中判太常寺爲羣牧使兼侍讀學士進中書舍人卒贈
尚書禮部侍郎

絃字望之以蔭歷官知鄆縣鄆濱海惡少販魚鹽者羣
居洲島或掠商人財物入海吏不能禁絃至設方略使

識者質惡少船及歸始給還且戒諭之由是不敢爲盜以億文獻賜進士出身通判越州知筠州提點江東刑獄除轉運按察使江東饑紘開義倉賑之吏持不可紘曰義倉爲民也稍稽人將殍矣紘御下急常曰不法之人不可貸去之止不利一家爾豈可使郡邑千萬家俱受害邪聞者望風解去或過期不敢之官與王鼎王綽號江東三虎坐降知衡州徙越州爲荆南轉運使徙福建不赴知湖州復爲江東轉運使官至太常少卿卒紘性嚴雖家居兒女不敢妄言笑聚書數萬卷手抄事實名窺豹篇

晁迥字明遠世爲澶州清豐人自其父佺始徙家彭門迥舉進士爲大理評事歷知岳州錄事參軍改將作監丞稍遷殿中丞坐失入囚死罪奪二官復將作丞監徐婺二州稅遷太常丞真宗卽位用宰相呂端參知政事李沆薦擢右正言直史館獻咸平新書五十篇又獻理樞一篇召試除右司諫知制誥判尚書刑部帝北征雍王元份留守京師加右諫議大夫爲判官進翰林學士未幾知審官院爲明德章穆二園陵禮儀使同修國史知大中祥符元年貢舉封泰山祀汾陰司太常詳定儀注累遷尚書工部侍郎使契丹還奏北庭記加史館修

撰知通進銀臺司獻玉清昭應宮頌其子宗操繼上景靈宮慶成歌帝曰迥父子同獻歌頌搢紳間美事也史成擢刑部侍郎進承旨時朝廷方脩禮文之事詔令多出迥手嘗夜召對帝令內侍持燭送歸院方盛暑爲蠲宿直令三五日一至院迥辭以非故事乃聽俟秋還直遷兵部侍郎請分司西京特拜工部尚書集賢院學士判西京留司御史臺賜一子官河南以就養仁宗卽位遷禮部尚書居臺六年累請老以太子少保致仕給全俸歲時賜賚如學士天聖中迥年八十一召宴太清樓免舞蹈子宗慤爲知制誥侍從同預宴迥坐御史中丞

之南與宰相同賜御飛白大字既罷所以寵賚者甚厚
進太子少傅後復召對延和殿帝訪以洪範雨暘之應
對曰比年變災荐臻此天所以警陛下願陛下修飭王
事以當天心庶幾轉亂而爲祥也既而獻斧戾慎刑箴
大順審刑無盡燈頌凡五篇及感疾絕人事屏醫藥具
冠服而卒年八十四罷朝一日贈太子太保諡文元迥
善吐納養生之術通釋老書以經傳傳致爲一家之說
性樂易寬簡服道履正雖貴勢無所屈歷官臨事未嘗
挾情害物真宗數稱其好學長者楊億嘗謂迥所作書
命無過褒得代言之體喜質正經史疑義標括字類有

以術命語迥迥曰自然之分天命也樂天不憂知命也
推理安常委命也何必逆計未然乎所著翰林集三十
卷道院集十五卷法藏碎金錄十卷耆智餘書隨因紀
述昭德新編各三卷子宗慤

宗慤字世良以父蔭爲秘書省校書郎屢獻歌頌召試
賜進士及第又除館閣校勘三遷大理寺丞集賢校理
兼注釋御集檢閱官迥領西臺宗慤求便養通判許州
仁宗卽位遷殿中丞同修起居注天聖中百官轉對宗
慤請減上供墾閑田擇獄官令監司舉縣令累遷尚書
祠部員外郎知制誥宋綬嘗謂自唐以來唯楊於陵身

見其子嗣復繼掌書命今始有晁氏焉父憂奪喪管勾
會靈觀入翰林爲學士母亡又起復兼龍圖閣學士權
發遣開封府事辨雪疑獄有能名元昊反關中久宿師
以宗慤安撫陝西與夏竦議攻守策未還道拜右諫議
大夫參知政事會朝廷以金飾胡床及金抹器賜唵廝
囉宗慤曰仲叔子奚辭邑請繁纓孔子曰不如多與之
邑繁纓諸侯之馬飾猶不可與陪臣况以乘輿之器賜
外臣乎必欲優其禮不若加賜金帛後從帝郊祠感疾
數求罷除資政殿學士給事中數日卒贈工部尚書諡
文莊宗慤性敦厚事父母孝篤於故舊凡任子恩皆先

其族人在翰林一夕草將相五制褒揚訓戒人得所宜嘗密詔訪邊策陳七事頗施用之

劉筠字子儀大名人舉進士爲館陶縣尉還會詔知制誥楊億試選人校太清樓書擢筠第一以大理評事爲秘閣校理真宗北巡命知大名府觀察判官事自邊鄙罷兵國家閒暇帝垂意篇籍始集諸儒考論文章爲一代之典筠預脩圖經及策府元龜推爲精敏真宗將祀汾睢屢得嘉獎召筠及監察御史陳從易崇和殿賦歌詩帝數稱善車駕西巡又命筠纂土訓是時四方獻符瑞天子方典禮文之事筠數上賦頌及冊府元龜成進

左正言直史館脩起居注嘗屬病予告滿輒再予積二百日每詔續其奉遷左司諫知制誥加史館脩撰出知鄧州徙陳州還糾察在京刑獄知貢舉遷尚書兵部員外郎復請鄧州未行進翰林學士初筠嘗草丁謂與李迪罷相制既而謂復留令別草制筠不奉詔乃更召晏殊筠自院出遇殊樞密院南門殊側面而過不敢揖蓋內有所愧也帝久疾謂浸擅權筠曰姦人用事安可一日居此請補外以右諫議大夫知廬州仁宗卽位遷給事中復召爲翰林學士踰月拜御史中丞先是三院御史言事皆先日中丞筠榜臺中御史自言事毋白丞雜

知天聖二年貢舉數以疾告進尚書禮部侍郎樞密直
學士知潁州召還復知貢舉進翰林學士承旨兼龍圖
閣直學士同修國史判尚書都省祀南郊爲禮儀使請
宿齋太廟日罷朝饗玉清昭應宮俟禮成備鑾駕恭謝
從之筠素愛廬江遂築室城中構閣藏前後所賜書帝
飛白書曰真宗聖文秘奉之閣再知廬州營塚墓作棺
自爲銘刻之旣病徙于書閣卒筠景德以來居文翰之
選其文辭善對偶尤工爲詩初爲楊億所識拔後遂與
齊名時號楊劉凡三入禁林又三典貢部以策論升降
天下士自筠始性不苟合遇事明達而其治尚簡嚴然

晚爲陽翟同姓富人奏求恩澤清議少之著冊府應言
榮遇禁林肥川中司汝陰三人玉堂凡七集一子蚤卒
田廬沒官包拯少時頗爲筠所知及拯顯奏其族子爲
後又請還所沒田廬云

薛映字景陽唐中書令元超八世孫後家于蜀父允中
事孟氏爲給事中歸朝爲尚書都官郎中映進士及第
授大理評事歷通判綿宋昇州累遷太常丞王化基薦
爲監察御史知開封縣太宗召對爲江南轉運使改左
正言直昭文館爲江淮兩浙茶鹽制置副使改京東轉
運使徙河東兼河西隨軍求便親知相州再領漕京東

積遷尚書禮部郎中擢知制誥權判吏部流內銓兼制
置羣牧使司梁顥安撫河北還權判度支映以右諫議
大夫知杭州映臨決蠶銳庭無留事轉運使姚鉉移屬
州當直司毋得輒斷徒以上罪映卽奏徒流笞杖自有
科條苟情狀明白何必繫獄以累和氣請詔天下凡徒
流罪於長吏前對辨無所異聽遣決之朝廷施用其言
與鉉旣不協遂發鉉納部內女口及鬻銅器抑取其直
又廣市綾羅不輸稅真宗遣御史臺推勘官儲映劾鉉
得實貶連州文學映坐常召人取告鉉狀當贖金帝特
貫之在杭五年入知通進銀臺司兼門下封駁事封秦

山爲東京留守判官遷給事中勾當三班院出知河南
府祀汾陰還駐驂西京以映有治狀賜御書嘉獎遷工
部尚書侍郎集賢院學士判尚書都省進樞密直學士
知昇州建言州以牛賦民出租牛死租不得蠲帝覽章
矍然曰此朝廷豈知邪因令諸州條奏悉蠲之頃之糾
察在京刑獄再判都省歷尚書左丞知揚州徙并州又
徙永興軍拜工部尚書兼御史中丞仁宗卽位遷禮部
再爲集賢院學士判院事知曹州分司南京卒贈右僕
射諡文恭映好學有文該覽強記善筆扎章奏尺牘下
筆立成爲治嚴明吏不能欺每五鼓冠帶黎明據案決

事雖寒暑無一日異也子耀卿秘閣校理孫紳直龍圖閣

論曰自唐末詞氣浸弊迄于五季甚矣先民有言政厖土裂大音不完必混一而後振宋一海內文治日起楊億首以辭章擅天下爲時所宗蓋其清忠鯁亮之氣未卒大施悉發於言宜乎雄偉而浩博也劉筠後出能與齊名氣象似爾至於文體之今古時習使然遑暇議是哉晁迥寬易與物無忤父子先後典書命稱爲名臣薛映學藝吏術俱優而挾忿以快人之私君子病之

宋史卷三百五

宋史卷三百六

元中書右丞相總裁脫脫等修

列傳第六十五

謝泌

孫何

弟僅

朱台符

戚綸

張去華

子師德

樂黃目

柴成務

謝泌字宗源歙州歙人自言晉太傅安二十七世孫少好學有志操賈黃中知宣州一見奇之太平興國五年進士解褐大理評事知清川縣徙彰明遷著作佐郎端拱初爲殿中丞獻所著文十篇古今類要三十卷召試中書以直史館賜緋時言事者衆詔閣門非涉僥望乃

許受之繇是言路稍壅泌抗疏陳其不可且言邊鄙有
事民政未乂狂夫之言聖人擇焉苟詰而拒之四聰之
明將有所蔽願采其可者拒其不可者庶顛顛之情得
以上達復言國家圖書多失次序唐景龍中嘗分經史
子集爲四庫命薛稷沈佺期武平一馬懷素分掌望遵
復故事遂令直館分典四部以泌知集庫改左正言使
嶺南採訪淳化二年久旱復上言時政得失時王禹偁
上言請自今庶官候謁宰相並須朝罷於政事堂樞密
使預坐接見將以杜私請詔從之泌上言曰伏覩明詔
不許宰相樞密使見賓客是疑大臣以私也書曰任賢

勿貳去邪勿疑張說謂姚元崇曰外則踈而接物內則
謹以事君此真大臣之體今天下至廣萬機至繁陛下
以聰明寄於輔臣自非接下何以悉知外事若令都堂
候見則庶官請見咨事略無解衣之暇今陛下囊括宇
宙總攬英豪朝廷無巧言之士方面無姑息之臣柰何
疑執政爲衰世之事乎王禹偁昧於大體妄有陳述太
宗覽奏卽追還前詔仍以泌所上表送史館會修正殿
頗施采繪泌復上疏亟命代以丹堊且嘉其忠蓋拜左
司諫賜金紫錢三十萬一日得對便殿太宗稱其任直
敢言泌奏曰陛下從諫如流故臣得以竭誠昔唐季孟

昌圖者朝疏諫而夕去位鑒於前代取亂宜矣太宗動色久之時羣臣升殿言事者既可其奏得專達於有司頗容巧妄泌請自今凡政事送中書機事送樞密金穀送三司覆奏而行從之俄判三司鹽鐵勾院奉詔解送國學舉人黜落既多羣聚喧詬懷甓以伺泌出泌知之潛由他塗入史館數宿不敢出請對自陳太宗問何官騶導嚴肅都人畏避有以臺雜對者卽授泌虞部員外郎兼侍御史知雜事上元觀燈泌特預召自是爲例轉金部員外郎充鹽鐵副使頃之魏羽爲使卽泌之外舅以親嫌改度支副使因郊祀條上軍士賞給之數太宗

曰朕惜金帛止備賞賜爾泌因曰唐德宗朱泚之亂後唐莊宗馬射之禍皆賞軍不豐之致今陛下薄於躬御賞賜特優實歷代之所難也俄與王沔同磨勘京朝官太宗孜孜爲治每御長春殿視事罷復卽崇政殿臨決日盱未進御膳泌言請自今長春罷政旣膳後御便坐不報俄知三班通進銀臺司出知湖州再遷主客郎中知虢州真宗初邊人屢寇泌上疏曰臣竊惟聖心所切者欲天下朝夕太平爾雍熙末趙普錄唐姚崇太平十事以獻未幾普復相時稱致治之策無出於此尋普病又遼騎擾邊因循未行今北邊謐寧繼遷請命則可行

於今日矣臣以爲先朝未盡行者俟陛下爾陛下自臨大寶邊不加兵西北肅然民安歲登則太平之象復何遠哉至於省不急之務削煩苛之政抑奔競來直言斯皆致太平之術又豈讓唐開元之治也議者或謂方今用兵異於開元且開元邊戎孔熾明皇卒與之和至如漢高祖亦然此皆屈己以寧天下豈以輕大國而競小忿乎請以近事言往歲討交阯三師一動南方幾搖先皇以爲得之無用棄之實便及授官爲藩屏則至今竄伏石晉之末耻講和契丹遂致天下橫流豈得爲強或者有言敵所嗜者禽色所貪者財利餘無他智計先朝

平晉之後若不舉兵臨之但與財帛則幽薊不日納土
矣察此乃知其情古猶今也漢祖明皇所用之計正可
以餌其心矣臣伏觀近詔以不逞之徒所陳述皆閭閻
事臣聞古先哲王詢于芻蕘察於邇言者蓋慮視聽之
蔽故採此以達物情亦罕行其事也先朝有侯莫陳利
用陳廷山鄭昌嗣趙贊之徙喋喋利口賴先帝聖聰尋
翦除之然爲患已深矣臣又聞輔時佐主建萬世之基
立不拔之策者必倚老成之人至如成康刑措由任周
召文景清靜不易蕭曹明皇太平亦資姚宋夫精練國
政酌斟王度未聞市井之胥走漣之吏可當其任也惟

陸下察往古用賢致治之道則賢者亦必盡忠竭力以
輔成太平之治矣咸平二年徙知同州代還知鼓司登
聞院五年與陳恕同知貢舉復知通進銀臺司加刑部
出爲兩浙轉運使近制文武官告老皆遷秩令錄授朝
官並給半俸泌言請自今七十以上求退者許致仕因
疾及歷任犯贓者聽從便詔可徙知福州代還民懷其
愛刻石以紀去思轉兵部郎中復知審官院直昭文館
知荆南府改襄州遷太常少卿右諫議大夫判吏部銓
大中祥符五年卒年六十三泌性端直然好方外之學
疾革服道士服端坐死帝聞而歎異遣使臨問恤賜錄

其子衍爲太常寺奉禮郎銜將作監主簿衍爲太子中舍

孫何字漢公蔡州汝陽人祖鎰唐末秦宗權據州強以賓佐起之鎰僞疾不應還家以講授爲業父庸字鼎臣顯德中獻贊聖策九篇引唐貞觀所行事以魏元成自况得對言曰武不可黷歛不可厚奢不可放欲不可極世宗奇其言命中書試補開封兵曹掾建隆初爲河南簿太平興國六年鴻臚少卿劉章薦其材改左贊善大夫歷殿中丞知龍州而卒何十歲識音韻十五能屬文篤學嗜古爲文必本經義在貢籍中甚有聲與丁謂齊

名友善時輩號爲孫丁王禹偁尤雅重之嘗作兩晉名臣贊宋詩二十篇春秋意尊儒教儀聞於時淳化三年舉進士開封府禮部俱首薦及第又得甲科解褐將作監丞通判陳州召入直史館賜緋遷秘書丞京西轉運副使歷右正言改右司諫真宗初何獻五議其一請擇儒臣有方略者統兵其二請世祿之家肄業太學寒雋之士州郡推薦而禁投贄自媒者其三請復制舉其四請行鄉飲酒禮其五請以能授官勿以恩慶例遷上覽而善之咸平二年舉入閣故事何次當待制獻疏曰六卿分職邦家之大柄也有吏部辨考績而育人材有兵

部簡車徒而治戎備有戶部正版圖而阜貨財有刑部
謹紀律而誅暴強有禮部祀神祇而選賢俊有工部繕
宮室而脩隄防六職舉而天下之事備矣故周之會府
漢之尚書立庶政之根本提百司之綱紀令僕率其屬
丞郎分其行二十四司粲焉星拱郎中員外判其曹主
事令史承其事四海九州之大若網在綱唐之盛時亦
不聞別分利權勅使額而軍須取足及元宗侈心旣萌
召發旣廣租調不充於是蕭景楊釗始以地官判度支
而宇文融爲租調地稅使始開利孔以構禍階至于肅
代則有司之職盡廢而言利之臣攘臂於其間矣於是

叛亂相仍經費不充迫於軍期切於國計用救當時之急卒以權宜裁之五代短促曾莫是思今國家三聖相承五兵不試太平之業垂統立制在此時也所宜三部使額還之六卿慎擇戶部尚書一人專掌鹽鐵使事俾金部郎中員外郎判之又擇本行侍郎二人分掌度支戶部使事各以本曹郎中員外郎分判之則三使洎判官雖省猶不省也仍命左右司郎中員外總知帳目分勾稽違職守有常規程既定則進無掎克之慮退有詳練之名周官唐式可以復矣茲事非艱在陛下行之爾是冬從幸大名詔訪邊事何疏曰陛下嗣位以來訓師

擇將可謂至多以高祖之大度兼蕭王之赤心神武冠於百王精兵倍於前代分閫仗鉞者固當以身先士卒爲心賊遺君父爲耻而列城相望堅壁自全手握強兵坐遠成筭遂使腥羶得計蛇豕肆行焚劫我郡縣係累我黎庶陛下攄人神之忿怒憫河朔之生靈爰御六師親幸澶魏天聲一振敵騎四逃雖鎮定道路已通而德棣烽塵未息此殆將帥或未得人邊奏或有壅闕鄰境不相救援糗糧須俟轉輸之所致也將帥者何或恃勇無謀或忌功玩寇但全城堡不卹人民邊奏者何護塞之臣固祿守位城池焚劫不以實聞老幼殺傷託言他

盜不救援者何緣邊州縣城壘叅錯如輔車唇齒之相依若頭目手足之相衛託稱兵少不出或待奏可乃行俟輦輸者何敵騎往還焱馳鳥逝羸糧景從萬兩方行迨乎我來寇已遁去此四者當今急務擇將帥則莫若文武之內叅用謀臣防壅闕則莫若凡奏邊防陛見庭問合救援則莫若督以軍令聽其便宜運糗糧則莫若輕齎疾驅角彼趨捷今大駕旣駐鄴下契丹終不敢萌心南牧所慮荐食者惟東北無備之城繕完周防不可不慎且蜂蠆有毒豺狼無厭今契丹西畏大兵北無歸路獸窮則搏物不可輕餘孽尚或稽誅奔突亦宜預備

大河津濟處處有之亦望量屯禁兵扼其要害則請和之使不日可待真宗覽而嘉之及傅潛逗撓無功何又請斬潛以徇俄權戶部判官出爲京東轉運副使又獻疏請擇州縣守宰省三司冗員遴選法官增秩益奉未幾徙兩浙轉運使加起居舍人景德初代還判太常禮院俄與晁迥陳堯咨並命知制誥賜金紫掌三班院何先以被疾勉強親職一日奏事上前墜奏牘於地俯而取之復墜笏有司劾以失儀詔釋之何慚上章求改少卿監分司西京養疾上不許第賜告遣醫診視醫勉其然艾何答曰死生有命卒不聽是冬卒年四十四上在

澶淵聞之憫惜錄其子言爲大理評事何樂名教勤接
士類後進之有詞藝者必爲稱揚然性褊急不能容物
在浙右專務峻刻州郡病焉好學著駁史通十餘篇有
集四十卷弟僅

僅字鄰幾少勤學與何俱有名于時咸平元年進士甲
科兄弟連冠貢籍時人榮之解褐舒州團練推官會詔
舉賢良方正之士趙安仁以僅名聞策入第四等擢光
祿寺丞直集賢院俄知浚儀縣景德初拜太子中允開
封府推官賜緋北邊請盟遣使交聘僅首爲國母生辰
使改本府判官遷右正言知制誥賜金紫同知審官院

是冬永興孫全照求代真宗思擇循良任之御書邊肅
洎僅二名示宰相或言僅嘗倅京府諳民政乃命知永
興軍府僅純厚長者爲政頗寬嘗詔戒焉大中祥符元
年加比部員外郎代還知審刑院頃之拜右諫議大夫
集賢院學士權知開封府改左諫議大夫出知河中府
歸朝復領審刑院久次進給事中天禧元年正月卒年
四十九錄其子大理評事和爲衛尉寺丞僅性端慤中
立無競篤於儒學士大夫推其履尚有集五十卷僅弟
侑亦登進士第至殿中丞

朱台符字拱正眉州眉山人父賦舉拔萃歷度支判官

卒于殿中丞台符少聰穎十歲能屬辭嘗作黃山樓記
士友稱之及長善詞賦時太宗廷試貢士多擢敏速者
台符與同輩課試以尺畧成一賦淳化三年進士登甲
科解褐將作監丞通判青州召入直史館賜緋魚再遷
秘書丞知浚儀縣咸平元年與楊礪李若拙梁顥同知
貢舉俄以京府舊僚擢太常博士出爲京西轉運副使
時北邊爲梗台符上言曰臣聞蠻夷猾夏帝典所載商
周而下數爲邊害或振旅薄伐或和親脩好歷代經營
斯爲良策至於秦築長城而黔首叛漢絕大漠而海內
虛逞志一時貽笑萬代此商鑒不遠也頃者晉氏失御

中原亂離太祖深鑒往古酌取中道與民休息遣使往來二十年間罕聞入寇大省戍邊之卒不興出塞之兵關防寧謐府庫克溢信深得制禦之道也幽薊之地實維我疆尚隔混同所宜開拓太宗平晉之後因其兵勢將遂取之人雖協謀天未厭亂螳斧拒轍用稽靈誅重與弔伐之師又作遷延之役自茲厥後大肆兇鋒殺略軍民攻拔城砦長驅深入莫可禁止當是時也以河爲塞而趙魏之間幾非國家所有旣阻歡盟乃爲備禦屯士馬益將帥芻粟之飛輓金帛之委輸贍給賞賜不可勝數繇是國家之食貨匱於河朔矣陛下自天受命與

物更始繼遷受節黎桓加爵咸命使者鎮撫其邦惟彼
契丹未加渥澤非所以柔遠能邇昭王道之無偏也今
祥禪將終中外引頸觀聽德音臣愚以爲宜於此時赦
契丹罪擇文武才略習知邊境辨說之士爲一介使以
嗣位服除脩好鄰國往告諭之彼十年以來不復犯塞
以臣計之力有不足志欲歸嚮而未得其間也今若垂
天覆之仁假來王之便必歡悅慕義遣使朝貢因與之
盡捐前惡復尋舊盟利以貨財許以關市如太祖故事
使之懷恩畏威則兩國旣和無北顧之憂可以專力西
鄙繼遷自當革心而束手矣是一舉而兩得也台符又

自請往使時論躉之咸平二年春早詔求直言台符上
疏請重農積穀任將選兵慎擇守令考課黜陟輕徭節
用均賦慎刑責任大臣與圖治道奏入優詔褒答入爲
鹽鐵判官改判戶部勾院拜工部員外郎換度支判官
景德初鄭文寶爲陝西轉運或言其張皇生事徙台符
代之仍賜金紫台符俊爽好謀然頗以刻碎爲舉職與
楊覃聯事覃頗欲因仍舊貫台符則更革煩擾議事違
戾交相倚奏以不協聞命御史視其狀九月徙台符知
郢州覃知徐州三年召還會執政有不喜者復出知洪
州卒於舟次年四十二賜其子公佐同學究出身賜錢

二十萬台符好學敏於屬辭喜延譽後進有集三十卷
公佐及台符弟昌符大中祥符中舉進士廷試並得第
五人初昌符登科宰相言昌符卽台符弟上因言台符
有文學及著述可採甚嗟悼之公佐卒又以次子壽隆
試將作監主簿昌符爲屯田員外郎

戚綸字仲言應天楚邱人父同文字文約自有傳綸少
與兄維以文行知名篤於古學喜談名教太平興國八
年舉進士解褐沂水主簿按版籍得逋戶脫口漏租者
甚衆徙知大和縣同文卒於隨州綸徒步奔計千里餘
俄詔起復蒞職就加大理評事江外民險悍多構訟爲

論民詩五十篇因時俗耳目之事以申規誨老幼多傳誦之每歲時必與獄囚約遣歸祀其先皆如期而還遷光祿丞坐鞫獄陳州失實免官著理道評十二篇錢若水王禹偁深所賞重久之復授大理評事知永嘉縣境有陂塘之利浚治以備水旱復爲光祿寺丞轉運使又上其政績連詔褒之真宗卽位轉著作佐郎通判秦州將行秘書監楊徽之薦其文學純謹宜在館閣命爲秘閣校理受詔考校司天臺職官定州縣職田條制詔館閣官以舊文獻上嘉綸所著特改太常丞俄判鼓司登聞院出內府緡帛市邊糧詔綸乘傳往均市之景德元

年判三司開拆賜緋魚改鹽鐵判官上疏言邊事甚被
嘉獎十月拜右正言龍圖閣待制賜金紫時初建是職
與杜鎬並命人皆榮之綸久次州縣留意吏事每便殿
請對語必移晷或夜中召見多所敷啓俄上奏曰夫出
納獻替王臣之任章疏奏議諫者之職臣屢蒙召對皆
延數刻屈萬乘之尊接一介之士聖德淵深包納荒穢
體其至愚不罪觸犯安敢循默不言謹摭十事該治本
者附于章左一曰王畿關輔二曰五等封建三曰復制
科四曰崇國學五曰闢曠土六曰脩貢舉七曰任大臣
八曰置平糶九曰益廂軍戒禁兵十曰脩六典令式詞

頗深切上爲嘉獎二年與趙安仁晁迥陳克朱巽同知
貢舉綸上言取士之法多所規制並納用焉預脩冊府
元龜會置官總在京諸司之務凡百三十司命綸與劉
承珪同領其事判鴻臚寺先是羣臣詔葬公私所費無
定式綸言其事詔同晁迥朱巽劉承珪校品秩之差定
爲制度遂遵行之綸以三公尚書九列之任唐末以來
有司漸繁綱目不一謂宜采通禮六典令式比類沿革
著爲大典時論稱之進秩右司諫兵部員外郎時詔禁
羣臣匿名上封及非次升殿奏事綸謂忠讜之入當開
獎言路若踈遠之士尤艱請對上頗嘉之大中祥符元

年掌吏部選事上初受靈文綸上疏曰臣遐稽載籍歷考秘文驗靈應之垂祥顧天人之相接陛下紹二聖丕業啓萬世洪基勤行企道恭默思元上天降鑒瑞牒昭錫聿示臨民之戒用恢奕葉之祥乞詔有司速脩大祀載命侍從摹寫祥符勒於嘉玉藏之太廟別以副本秘於中禁傳示萬葉無敢怠荒然臣恐流俗幻惑狂謀以人鬼之妖辭亂天書之真旨伏望端守元符凝神正道以答天貺以惠烝黎是冬封泰山命綸同計度發運事禮成遷戶部郎中直昭文館待制如故被詔同編東封祥瑞封禪記會峻待制之秩又兼集賢殿脩撰建議脩

釋奠儀頒于天下立常平倉隸司農寺以平民糴皆從之嘗宴餞种放于龍圖閣詔近臣爲序上覽綸所作稱其有史才三年擢樞密直學士上作詩寵之祀汾陰復領發運之職居無何出知杭州就加左司郎中屬江潮爲患乃立埽岸以易柱石之制雖免水患而衆頗非其變法胡則時領發運嘗居杭州肆縱不檢厚結李浦綸素惡之通判吳耀卿則之黨也伺綸動靜密以報則則時爲當塗者所昵因共摺撫綸過徙知揚州惟揚亦浦則巡內持之益急求改僻郡徙徐州八年與劉綜並罷學士授左諫議大夫代還復知青州歲饑發公廩以救

餓殍全安甚衆徙鄆州王遵誨爲勸農副使嘗任西邊
寓家永興閨門不肅事將發知府寇準爲平之綸因戲
謔語及準遵誨恚怒以爲汚已遂奏綸謗訕坐左遷岳
州團練副使易和州天禧四年改保靜軍副使是冬以
疾求歸故里改太常少卿分司南京五年卒年六十八
綸篤於古學善談名理喜言民政頗近迂濶事兄維友
愛甚厚維卒訃聞哀慟不食者數日與交游故舊以信
義著稱士子謁見者必詢其所業訪其志尚隨才誘誨
之嘗云歸老後得十年在鄉閭講習亦可以恢道濟世
大中祥符中繼脩禮文之事綸悉叅其議與陳彭年並

職屢召對多建條式恩寵甚盛樂於薦士每一奏十數人皆當時知名士晚節爲權倖所排遂不復振善訓子弟雖至清顯不改其純儉既沒家無餘貲張知白時知府事輟奉以助其喪家人於几閣間得遺戒一篇大率皆誘勸爲學有集二十卷又前後奏議有機務利害備邊均田之策別爲論思集十卷分上下篇天聖中其子舜賓獻之詔贈左諫議大夫舜賓官太子中書

張去華字信臣開封襄邑人父誼字希賈好學不事產業旣孤諸父使督耕隴上他日往視之見閱書于樹下怒其不親穡事詬辱之誼謂其兄曰若不就學於外素

志無成矣遂潛詣洛陽龍門書院與宗人沆鑾湜結友
故名聞都下長興中和疑掌貢舉誼舉進士調補耀州
團練推官晉天福初代還會疑由內署拜端明殿學士
署門不接賓客誼聞之卽日致書于疑以爲切近之職
實當顧問四方利害所宜詢訪若不接賓客聾瞽耳目
坐虧職業雖爲自安計其可得乎疑大奇之他日薦于
宰相桑維翰曰疑門生中有張誼者性介直頗涉詞藝
可備諫職未幾超拜左拾遺誼以晉室新造典禮未完
數上章請復有唐故事又言契丹有援立之助所宜敦
信謹備不可自逸以啓釁端改右補闕克集賢殿脩撰

歷禮部員外郎侍御史改倉部知制誥加禮部郎中乾
祐初真拜中書舍人時蘇逢吉楊邠王章輩攀附漢祖
驟得大用縉紳多附之誼不爲屈故共嫉之遣誼爲吳
越宣諭使與兵部郎中馬承翰同往賜官誥浙人每迓
朝使必列步騎以自誇詫誼與承翰竊笑之又乘酒言
詞有輕發者錢俶甚耻之乃奏誼擅箠防援官又夜集
與承翰使酒語相侵坐貶均州司戶改房州司馬歲餘
卒去華幼勵學敏於屬辭以蔭補太廟齋郎周世宗平
淮南去華時年十八慨然歎曰兵戰未息民事不脩非
馭國持久之術因著南征賦治民論獻于行在召試授

御史臺主簿屬三院議事不得預坐謂所親曰簿領之職非壯夫所爲卽棄官歸鄭州杜門不出者三載建隆初始携文遊京師大爲李昉所稱明年舉進士甲科卽拜秘書郎直史館以歲滿不遷上章自訴因言制誥張澹盧多遜殿中侍御史蘇頌文學膚淺願得校其優劣太祖立召澹輩與去華臨軒策試命陶穀等考之澹以所對不應問降秩卽擢去華爲右補闕賜襲衣銀帶鞍勒馬朝議薄其躁進以是不遷秩者十六年嘗得對便殿詢及家世遂訴父始忤權貴因罹重貶宰相薛居正亦爲言之太祖爲之動容且曰漢室不道姦臣擅權此

朕所親見也荆湖平命通判道州去華上言桂管爲五
嶺衝要今劉鋹保境固守賴之爲扞蔽若大軍先克其
城以趣番禺如踐無人之境且言桂州可取之狀有詔
嘉獎代還知磁乾二州選爲益州通判遷起居舍人知
鳳翔府從太祖征太原監隨駕左藏庫就命爲京東轉
運使歷左司員外郎禮部郎中太平興國七年爲江南
轉運使雍熙中王師討幽州去華督宋州饋運至拒馬
河就命掌河北轉運事三年加陝州未行著大政要錄
三十篇以獻上覽而嘉之詔書褒美賜采五十匹因留
不遣會許王尹京命爲開封府判官殿中侍御史陳載

爲推官並賜金紫謂曰卿等皆朝之端士特加選用其善佐吾子各賜錢百萬踰歲就拜左諫議大夫又令樞密使王顯傳旨諭以輔成之意未幾有廬州尼道安訟弟婦不實府不爲治械繫送本州弟婦卽徐鉉妻之甥道安伐登聞鼓言鉉以尺牘求請去華故不爲治上怒去華坐前一任貶安州司馬歲餘召授將作少監知興元府未行改晉州遷秘書少監知許州真宗嗣位復拜左諫議大夫未幾遷給事中知杭州兩浙自錢氏賦民丁錢有死而不免者去華建議請除之有司以經費所仰固執不許咸平二年徙蘇州頃之以疾求分司西京

在洛葺園廬作中隱亭以見志景德元年改工部侍郎
致任三年卒年六十九去華美姿貌善談論有蘊藉頗
尚氣節在營道得父同門生何氏二子教其學問受代
携之京師慰薦館穀並登仕籍嘗獻元元論大旨以養
民務穡爲急真宗深所嘉賞命以縑素寫其論爲十八
軸列置龍圖閣之四壁然不飭邊幅頗爲清議所貶以
是不登顯用有集十五卷子師古至國子博士師錫殿
中丞師顏國子博士

師德字尚賢去華十子最器師德嘗欲任以官辭不就
去華曰此兒必繼吾志真宗祀汾陰知河南府薛映薦

其學行又獻汾陰大禮頌于行在是歲舉進士亦爲第一時人榮之除將作監丞通判耀州遷秘書省著作郎集賢校理判三司都理欠憑由司建言有逋負官物而被繫本非侵盜若惇獨貧病無以自償願特蠲之帝用其言嘗奏事殿中帝訪以時事而條對甚備帝喜曰朕藩邸知卿父名今又知卿才其後每遣使帝輒曰張師德可用契丹高麗使來多以師德主之天禧初安撫淮南苦風眩改判司農寺擢右正言知制誥判尚書刑部頃之出知潁州遷刑部員外郎判大理寺爲羣牧使景靈宮判官再遷吏部郎中以疾知鄧州徙汝州拜左諫

議大夫罷知制誥師德孝謹有家法不交權貴時相頗不悅之然亦多病在西掖九年不遷卒于官有文集十卷子景憲爲太中大夫

樂黃目字公禮撫州宜黃人世仕江左李氏父史字子正齊王景達鎮臨川召奏牋授秘書郎入朝爲平原主簿太平興國五年與顏明遠劉昌言張觀並以見任官舉進士太宗惜科第不與但授諸道掌書記史得佐武成軍旣而復賜及第上書言事擢爲著作佐郎知陵州獻金明池賦召爲三館編修雍熙三年獻所著貢舉事二十卷登科記三十卷題解二十卷唐登科文選五十

卷孝弟錄二十卷續卓異記三卷太宗嘉其勤遷著作郎直史館轉太常博士知舒州遷水部員外郎淳化四年春與司封員外郎直昭文館李銜同使兩浙巡撫加都官知黃州又獻廣孝傳五十卷總仙記一百四十一卷詔秘閣寫本進內史好著述然博而寡要以五帝三王皆云仙去論者嗤其詭誕咸平初遷職方復獻廣孝新書五十卷上清文苑四十卷出知商州史前後臨民頗以賄聞俄以老疾爲言聽解職分司西京五年郊祀畢奉留守司表入賀因得召對上見其矍鑠不衰又知篤學盡取所著書藏秘府復授舊職與黃目同在文館

人以爲榮出掌西京磨勘司黃目爲京西轉運改判留
司御史臺車駕幸洛召對賜金紫史久在洛因卜居有
亭榭竹樹之勝優游自得未幾卒年七十八所撰又有
太平寰宇記二百卷總記傳百三十卷坐知天下記四
十卷商顏雜錄廣卓異記各二十卷諸仙傳二十五卷
宋齊邱文傳十三卷杏園集李白別集神仙宮殿窟宅
記各十卷掌上華夷圖一卷又編已所著爲仙洞集百
卷黃目淳化三年舉進士補伊闕尉遷大理寺丞知壽
安縣咸平中徙知壁州未行上章言邊事召對拜殿中
丞久之直史館知浚儀縣俄上言曰伏以從政之原州

縣爲急親民之任牧宰居先今朝官以數任除知州簿尉以兩任入縣令雖功過易見而能否難明伏見唐開元二年選羣官有宏才通識堪致理化者授刺史都督又引新授縣令於宣政殿試理人策一道惟郵城令袁濟及格擢授醴泉令餘二百人且令赴任十餘人並放令習學臣欲望自今審官院差知州銓曹注縣令候各及三二十人一次引見於御前試時務策一道察言觀行取其才識明於吏治達於教化者克選其有不分曲直罔辨是非者或黜之釐務或退守舊資如此則官得其人事無不治上頗嘉其好古歷度支鹽鐵判官遷太

常博士京西轉運使丁內艱時真宗將幸洛以供億務繁起令蒞職史尋卒上復詔權奪大中祥符中使契丹還改工部員外郎廣南西路轉運使就拜起居郎改陝西轉運使賜金紫陳堯咨知永興好以氣凌黃目因表求解職不許堯咨多縱恣不法有密言其事者詔黃目察之得實以聞堯咨坐罷龍圖閣職徙知鄧州八年黃目入判三司三勾院天禧初馬元方奏黃目職事不舉遂分三勾院以三人掌之黃目罷任奉朝請踰月拜兵部員外郎知制誥克會靈觀判官黃目屬辭淹緩朝議以爲不稱職時以盛度知京府辭不拜卽遷黃目右諫

宋史卷三十一 列傳
三十一
議大夫權知開封府度爲會靈觀判官兩換其任仁宗
升儲拜給事中兼左庶子入內副都知張繼能嘗以公
事請託黃目至是未申謝事敗降左諫議大夫知荆南
府明年復爲給事中徙潭州長沙月給減於荆諸州特
詔增之又諭以兵賦繁綜寄任之意五年代還知審官
院黃目以風疾題品乖當改知通進銀臺司兼門下封
駁事數月求外任得知亳州俄而幼子死聞訃絕慟所
疾加甚卒年五十六錄其子理國爲衛尉寺丞定國爲
大理評事黃目面柔簡默爲吏處劇亦無敗事有集五
十卷又撰學海搜奇錄四十卷聖朝郡國志二十卷黃

目兄黃裳弟黃庭黃裳孫滋並進士及第黃裳黃庭皆至太常博士

柴成務字寶臣曹州濟陰人也父自牧舉進士能詩至兵部員外郎成務乾德中京府拔解太宗素知其名首薦之遂中進士甲科解褐陝州軍事推官改曹單觀察推官遷大理寺丞太平興國五年轉太常丞克陝西轉運副使賜緋再遷殿中侍御史八年與供奉官葛彥恭使河南案行遙隄歷知果蘇二州就爲兩浙轉運使改戶部員外郎直史館賜金紫入爲戶部判官遷本曹郎中太宗選郎官爲少卿監以成務爲光祿少卿俄奉使

高麗遠俗尚拘忌以月日未利拜恩稽留朝使成務貽書往反開諭大體國人信服事具高麗傳淳化二年爲京東轉運使會宋州河決成務上言河水所經地肥澱願免其租稅勸民種藝從之召拜司封郎中知制誥賜錢三十萬時呂蒙正爲宰相嘗與之聯外姻避嫌辭職不許俄與魏庠同知京朝官考課四年又與庠同知給事中事凡制敕有所不便者許封駁以聞蜀寇平使峽路安撫改左諫議大夫知河中府時銀夏未寧蒲津當餽輓之衝事皆辦集得脫戶八百家以附籍府城街陌頗隘狹成務曰國家承平已久如車駕臨幸何以駐千

乘萬騎邪乃奏撤民廬以廣之其後祀汾陰果留蹕河中衢路顯敞咸以爲便真宗卽位遷給事中知梓州未幾代還又遣知青州表求俟永熙陵復土畢之任旋受詔與錢若水等同脩太宗實錄書成知揚州入判尚書刑部本司小吏倨慢成務怒而笞之吏擊登聞鼓訴寃有詔問狀成務歎曰忝爲長官杖一胥而被劾何面目據堂決事邪乃求解職景德初卒年七十一成務有詞學博聞稽古善談論好諧笑士人重其文雅然爲郡乏廉稱時論惜之文集二十卷成務年六十六始有子比卒裁六歲授奉禮郎名貽範後爲國子博士

宋史卷三百六 友傳
論曰泌述唐漢之治台符陳商周之鑒歷布腹心奏議
反覆論當世事盡言無隱何建五議綸摠十事皆切於
輔治何勤接士類綸樂於薦士皆足以儀表當世者也
去華頗尚氣節而能作成後進黃目屬辭淹緩而著述
浩瀚成務寡清白之操而專對不辱俱有足稱者焉

宋史卷三百六

宋史卷三百七

元中書右丞相總裁脫脫等修

列傳第六十六

喬維岳

王陟附

張雍

董儼

魏廷式

盧琰

宋搏

凌策

楊覃

陳世卿

李若拙

子繹

陳知微

喬維岳字伯周陳州南頓人治三傳周顯德初登第授太湖主簿四年遷平輿令開寶中右拾遺劉稹薦其才擢爲太子中舍知高郵軍通判揚州徙常州金陵平又移昇州改殿中丞太平興國初徙襄州俄丁內艱三年

陳洪進表納疆土以其子文顯爲泉州留後朝廷議擇能臣關掌郡事卽起維岳爲通判會盜起仙遊莆田縣百丈鎮衆十餘萬攻城城中兵裁三千勢甚危急監軍何承矩王文寶欲盡屠其民燔府庫而遁維岳挺然抗議以爲朝廷寄以綏遠今惠澤未布盜賊連結反欲屠城豈詔意哉承矩等因復監守旣而轉運使楊克讓率福州兵破賊圍遂解詔褒之歸朝爲淮南轉運副使遷右補闕進爲使淮河西流三十里曰山陽灣水勢湍悍運舟多罹覆溺維岳規度開故沙河自末口至淮陰磨盤口凡四十里又建安北至淮瀝總五堰運舟所至十

經上下其重載者皆卸糧而過舟時壞失糧綱卒緣此
爲姦潛有侵盜維岳始命砌二斗門于西河第三堰二
門相距踰五十步覆以厦屋設縣門積水俟潮平乃泄
之建橫橋岸上築土累石以牢其址自是弊盡革而運
舟往來無滯矣嘗按部至泗州慮獄法掾誤斷囚至死
維岳詰之法掾俯伏且泣曰有母年八十餘今獲罪則
母不能活矣維岳憫之因謂曰他日朝制按問第云轉
運使令處茲罪卒如其言獲免維岳坐贖金百二十斤
罷使職權知楚州遷戶部員外郎代還爲度支判官轉
本曹郎中出爲兩浙轉運使歷知懷州滄州會考課京

朝官召還屬真宗以壽王尹京精擇府僚留爲開封府
推官或言維岳在淮南決獄不平充左右有知其事者
辯之太宗特加賞異儲闈建兼左諭德轉太常少卿京
府事繁維岳評處詳敏有王陟爲司錄真宗亦稱其明
幹及踐祚卽命維岳與畢士安權知開封府拜給事中
知審官院維岳體肥年衰艱於拜趨陳乞外遷小州上
嘉其靜退特授海州刺史咸平初知蘇州素病風上以
吳中多食魚蟹乃徙壽州仍命太醫馳療之四年卒年
七十六贈兵部侍郎官給其葬大中祥符中錄其孫世
昌獻之並賜同學究出身維岳明習吏事有治劇才在

懷州王欽若始舉進士維岳知其貴又善待陳彭年自刺郡連奏爲通判皆稱薦之

王陟者潞州上黨人淳化三年舉進士補嵐州團練推官內侍羅懷嗣言其督運有勞遷晉州觀察推官至道初度支判官李擇言薦爲著作佐郎同判大名府留知開封府司錄參軍前司錄閻仲卿喜云爲屢升殿奏事真宗尹京時頗不悅及陟代之以謹幹聞尤被待遇卽位召賜緋魚袋改著作郎開封府推官乘傳陝西與轉運使督餽靈武芻糧咸平初遷太常博士出爲河東轉運使賜金紫時趙保吉納欵屢遣與內侍張崇貴裁度

邊事正其經界又副崇貴使夏州賜誥命代歸會溫仲
舒知貢舉命陟與刑部員外郎董龜正同考試及封印
卷首俄改工部員外郎知棣州五年召歸判三司鹽鐵
勾院初上以京府之舊頗隆眷遇將加擢用會有言其
在貢部舉子有納賄成名者恃恩寵希顯要僦大第以
居事遂寢六年卒上甚憫之錄其子若拙爲奉禮郎若
谷爲太廟齋郎後陟妻卒又命給其子奉使終喪制若
拙官國子博士

張雍德州安德縣人治毛氏詩開寶六年中第釋褐東
關尉太平興國初有薦其材者召歸改將作監丞知南

雄州遷太子右贊善大夫知開封府司錄參軍事俄爲
秘書丞充推官京城民王元吉者母劉早寡有姦狀爲
姻族所知憂悸成疾又懼元吉告之遂遣侍婢訴元吉
寘葢食中以毒已病將死事下右軍巡按之未得實移
左軍巡推吏受劉賄掠治元吉自誣伏俄而劉死府慮
囚元吉始以實對又移付司錄盡捕元推吏稍見誣構
之跡且以逮捕者衆又獄已累月未能決府中懼其淹
刻狀引見詔免死決徙元吉大呼曰府中官吏悉受我
賂反使我受刑乎府不敢決元吉歷陳所受賂主名又
令妻張擊登聞鼓訴之上召張臨軒顧問盡得其枉狀

立遣中使捕元推官吏付御史鞠治時滕中正爲中丞
雍妻父也詔供奉官蔚進別鞠之雍坐與知府劉保勳
判官李繼凝初慮問元吉稱寃徙左軍巡雍戒吏止令
鞠其毒母狀致吏訊掠慘暴上怒雍及左右軍巡判官
韓昭裔宋廷煦悉坐免所居官保勳繼凝各奪一等奉
左右軍巡使殿直龐則王榮並降爲殿前承旨雍熙初
雍復爲祕書丞御史臺推直官改鹽鐵推官遷右補闕
充判官端拱初轉工部郎中判度支勾院未幾又爲鹽
鐵判官兼判勾院逾年以本官兼侍御史知雜事月餘
出爲淮南轉運使淳化初遷爲太府少卿二年加右諫

議大夫徙兩浙轉運使入知審刑院三年充戶部使出
知梓州就命爲西川轉運使俄復知梓州五年蜀州青
城民王小波李順作亂衆至萬人雍訓練士卒得城中
兵三千餘人又募彊勇千餘守城輦綿州金帛以實帑
藏推官陳世卿治戎器掌書記施謂權鹽院判官謝濤
伐山木爲竿銷銅鍾爲箭鏑紐布爲索守械悉備遣推
官盛梁請兵于朝未幾益綿邛彭漢州永康軍悉陷于
賊順入成都僭號大蜀王勢甚盛遣其黨楊廣將十萬
衆寇劍門相里貴帥衆十萬圍梓潼雍與監軍盧斌登
堞望之賊所出兵皆老弱疲憊無鎧甲斌笑請開北門

擊之雍曰不可賊或詐見老弱設伏伺我又城中吏民心未定脫爲伏兵所突則墮其姦計非良策也言未畢果有卒依敵樓呼嘯與外應和雍亟斬以徇賊大設梯衝火車晝夜鼓譟攻城益急城中大恐雍命發機石碎之火箭雜下賊稍退復治攻具城西北隅雍給曰軍士趣治裝吾將開東門擊賊陽遣步騎五百臨東門賊升牛頭山瞰城內信然伏精兵萬餘山之東隅以待我雍卽召敢死士百輩縋而下盡焚其攻具自午達申殆盡賊以爲神凶黨數乘城進戰皆不利一日北風晝晦賊乘風縱火急攻北門雍與盧斌等領兵據門立矢石間

固守不動賊爲之少却長圍八十餘日會王繼恩遣石知顛來援賊始潰去遣施謂入奏上手詔褒美擢雍給事中斌西京作坊使領誠州刺史世卿掌書記謂節度判官濤觀察推官又以通判將作監丞趙賀爲太子中舍監軍供奉官辛規爲內殿崇班至道二年改工部侍郎明年召歸復知永興軍轉禮部侍郎改刑部充度支使咸平四年遷鹽鐵使上以雍齷齪小心三司事重宜有裁制乃用王嗣宗代之又以其無過特拜戶部侍郎復知審刑院出知秦州徙鳳翔府景德初權知開封府事上覽奏獄京府囚二百餘人以爲淹繫遣給事中董

儼直昭文館韓國華同慮問決遣之三年改兵部侍郎
同知審官院明年車駕朝陵判留司尚書省出知鄧州
大中祥符元年請老以尚書右丞致仕誥命未至而卒
年七十雍性鄙吝蒞事勤恪善爲米鹽苛察以肅下恃
其清幹受遇於時益矯厲以取名譽所至藩鎮宴犒率
皆裁節聚公錢爲羨餘以輸官帑集會賓佐糲食而已
在三司置簿籍有按前急馬前急急中急之日頗爲時
論所誚雍姿貌魯朴始登科爲滕中正婿中正子錫世
寧咸笑之中正曰此人異日必顯達壽考非汝曹所及
錫兄弟雖有名然終不越郎署亦無耆年者子太冲官

殿中丞

董儼字望之河南洛陽人太平興國三年進士解褐大理評事通判饒州加著作佐郎五年授左拾遺直史館轉右補闕充淮南西路轉運副使會罷使就命知光州儼狂躁務進不樂外郡上書乞還京師太宗怒降爲秘書丞削史館職徙知忠州復爲右補闕俄復直史館會併水陸發運爲一儼與王繼昇同領其事就轉刑部員外郎端拱初進郎中三司度支副使坐翟馬周事左授海州團練副使移知泰州踰年以戶部員外郎知泉州召爲京東轉運使時三司改易制度置三計使因留拜

右諫議大夫充右計使使罷出知揚州遷右諫議大夫徙潭州轉給事中歷知廣岳洪三州江陵府景德中歸朝會開封府繫囚三百餘人朝議以其稽滯命儼與韓國華張雍同慮問裁決之俄判吏部銓加工部侍郎時黃觀罷西川轉運歸闕儼與知雜御史王濟姻家因託濟言於觀求薦已知益州未幾觀復領陝西轉運得對便殿儼謂其必薦已他日面陳自以孤直不爲權要所容況黃觀庸淺無操持恐爲執政所使妄有論薦俾臣遠適惟陛下察之真宗不之詰數日王濟得對因述儼嘗有私託且言儼性本矯詐臣語觀不可許之真宗不

欲暴其事乃出儼知青州儼復請對言爲權臣所擯上
慰遣之久而不去乃謂之曰爾自告黃觀求知益州復
有何人排斥乎儼卽矍然且言觀濟嘗議益州須得臣
往彈壓之上以其詞不類因令條析以聞復遣使陝西
質問黃觀觀具述儼託王濟求薦之事且言儼素待臣
非厚初淳化中儼爲計使觀爲判官儼知觀不飲酒一
日聚食親酌以勸觀觀爲強飲之有頃都監趙贊召觀
議事觀卽往贊曰飲酒耶觀以實對翌日儼與贊密奏
觀嗜酒廢職故觀因是及之乃詔樞密直學士劉綜與
御史雜治之儼方引伏坐責授山南東道節度行軍司

馬不署州事大中祥符初會赦起知郢州病疽卒年五十四儼俊辯有材幹不學無操行所至厚納貨賂嘗令引贊吏改製朱衣每夕納儼第而潛以輕帛製衣易之在銓司命胥吏市物及請其直則呵責之其鄙屑如此又廣畜姬媵頗事豪侈用傾狡圖位終以是敗士大夫醜之東封恩復其官子仲容仲宗金爲太子中舍兄偉至殿中丞致仕

魏廷式字君憲大名宗城人少明法學嘗客遊趙州舍于監軍魏咸美之解解有西堂素凶咸美知廷式有膽氣命居之卒無恙來京師咸美弟咸信延置館舍以同

宗善待之太平興國五年中第釋褐朗州法曹掾轉運使李惟清以其吏材奏知桃源縣遷將作監丞端拱初改著作佐郎通判潁州淳化二年始命李昌齡判審刑院以廷式明練刑章奏爲詳議官屢進對太宗悅其明辯遷太子左贊善大夫時初較廷臣殿最命廷式與樞密都承旨趙鎔李著同勾當三班多所規制越王生日令持禮物賜之超拜主客員外郎判三司都勾院換河南東道判官改戶部員外郎知利州李順爲盜就命充陝西至益州路轉運使後入奏事太宗謂曰有事當白中書廷式曰臣三千七百里外乘驛而至以機事上聞

願取斷宸衷非爲宰相來也卽不時召對問方略稱旨
賜錢五十萬令還任賊平知寧州未至召入判大里寺
至道初乘傳河朔決獄復出知宋潭二州湖南地土衍
沃民喜訟產有根柢巧僞難辯者廷式立裁之吏民咸
服轉吏部員外郎知桂州歷工部郎中眞宗卽位改刑
部會王繼恩有罪下吏命廷式同按之踰宿而獄具俄
知審官院通進銀臺封駁司拜右諫議大夫知審刑院
出知涇州咸平二年卒年四十九錄其子攝太常寺太
祝舜卿爲太祝禹卿同學究出身廷式所至以嚴明稱
剛果敢言爲人主厚遇然性傾險喜中傷人士君子憚

其口而鄙其行

盧琰字錫圭淄州淄川人父浚右諫議大夫琰太平興國八年進士舉解褐歷城主簿歷大理評事知安吉縣三遷太常丞通判并州至道中就加太常博士咸平二年選爲開封府判官與推官李防並命真宗謂宰相曰人之有材難得盡知但歷試而後可見占謝日特升殿諭以天府事繁慎選之意仍賜緡錢會獄空有詔獎之遷工部員外郎爲河北轉運副使時北鄙未寧調發軍儲糧道不絕以職務脩舉召入遷秩刑部賜金紫復遣之任會城祁州命專董其役契丹入邊車駕幸澶州琰

自定州隨軍至大名卽單騎赴行在召對勞問久之其
子士宗時爲隰州推官特遷大理寺丞契丹請和琰上
言領職六年求歸闕許之以使勞優拜吏部員外郎判
三司三勾院會宋搏使契丹命權戶部副使時議東封
又權京東轉運使往營頓置加戶部郎中復判三勾院
大中祥符二年以本官兼侍御史知雜事數月授三司
度支副使祀汾陰歲命與鮑中和同判留守司三司加
吏部郎中俄拜右諫議大夫知永興軍府五年再爲河
北轉運使琰勤吏職所至以幹集聞頗知命嘗語親舊
曰官五品服三品天不與者壽爾明年被疾詔遣中使

將太醫診視六年卒年五十九時琰母八十餘無恙上憫之以士宗爲太常博士特命知懷州又以次子祕書丞士倫爲太常博士給祿終喪士倫至工部郎中度支副使士宗自有傳

宋搏字鵬舉萊州掖人治毛氏詩開寶八年宋準典貢部得第調補遂寧尉歷濰州司理參軍改白虎令膳部員外郎鞠礪薦其能遷右贊善大夫知利豐監徙知藤州改殿中丞通判洪州復有薦者召還命提點河北西路刑獄未行改監左藏庫遷國子博士通判西京留守司得對便坐賜錢三十萬久之徙江南轉運使就遷度

支員外郎真宗嗣位遷司封員外郎河東轉運使上言
大通監冶鐵盈積可備諸州軍數十年鼓鑄願權罷採
以紓民又請科諸州丁壯爲兵以增戎備在任凡十一
年河東接西北境時邊事未息屯師甚廣搏經制漕運
以幹治稱連徙他州郡輒乞留有詔褒飭兩至夏州界
部發居民數詣闕奏事稱旨屢以秩滿請代朝議以搏
善職就加祠部郎中賜金紫嘗薦代州承受使臣王白
上以本置此職止於視軍政察邊事搏不應保奏因詔
諸路自今勿得舉承受使臣景德四年入判三司勾院
踰月爲戶部副使大中祥符初進秩刑部郎中俄使契

丹會疾契丹主以車迎之二年卒年六十六子可法至太子中舍舜元登進士第擢卒舜元自筠州判官改著作佐郎又賜其孫出身

凌策字子奇宣州涇人世給事州縣策幼孤獨厲志好學宗族初不加禮因決意渡江與姚鉉同學於廬州雍熙二年舉進士起家廣安軍判官改西川節度推官以彊幹聞淳化三年就命爲光祿寺丞簽書兩使判官代還拜左贊善大夫通判定州賜朱衣錦章御書歷給以實奉李順之亂川陝選官多憚行策自陳三蒞蜀境諳其民俗卽命知蜀州又以巴西當益之饘道徙綿州加

太常博士還朝會命爲廣南西路轉運使進屯田員外郎入爲戶部判官遷都官先是嶺南輸香藥以郵置卒萬人分鋪二百負擔抵京師且以煩役爲患詔策規制之策請陸運至南安汎舟而北止役卒八百大省轉送之費盧之翰任廣州無廉稱以策有幹名拜職方員外郎直史館命代之賜金紫廣英路自吉河趣板步二百里當盛夏時瘴起行旅死者十八九策請由英州大源洞伐山開道直抵曲江人以爲便代還知青州東封以供億之勤超拜都官郎中入判三司三勾院出知揚州屬江淮歲儉頗有盜賊以策領淮南東路安撫使駕旋

使停進秩司封時洪州水知州李元病上與宰相歷選朝士將徙策代之上曰南昌水潦艱殆長吏當便宜從事不必稟於外計也王旦言策蒞事和平可寄方面望卽以江南轉運使授之仍詔諭差選之意饒州產金嘗禁商市鬻或有論告逮繫滿獄策請縱民販市官責其筭人甚便之五年召拜右諫議大夫集賢殿學士知益州初策登第夢人以六印加劍上遺之其後往劍外凡六任時以爲異策勤吏職處事精審所至有治迹九年自蜀代還上頗有意擢用會已病命知通進銀臺司兼門下封駁事糾察在京刑獄眞宗嘗對王旦言策有才

用治蜀敏而有斷旦曰策性淳質和臨事彊濟上深然之是秋拜給事中權御史中丞時權茶之法弊甚詔與翰林學士李迪知雜御史呂夷簡同議經制稍寬其舊明年疾甚不能朝謁累遣中使挾醫存問賜名藥復表求典益尋遷工部侍郎從其請天禧二年三月卒年六十二錄其子將作監主簿瓘琬並爲奉禮郎續給其奉策兄簡官國子博士分司南京

楊覃字申錫漢太尉震之後唐有京兆尹憑居履道坊僕射於陵居新昌坊刑部尚書汝士居靖恭坊時稱三楊皆爲盛門而靖恭尤著汝士弟虞卿漢公魯士皆顯

名虞卿至工部侍郎京兆尹生堪爲太子少師堪生承
休昭宗朝以兵部員外郎使吳越會楊行密據淮甸絕
其歸路因留浙中承休生巖卽覃祖也署爲鎮海軍節
度副使奏領春州刺史巖生郁早卒覃少獻書於嗣王
俶俶私署著作佐郎從俶歸朝爲禹城尉太平興國八
年舉進士擢第授徐州觀察推官改著作佐郎知戎州
再遷太常博士使陝西蠲逋負覃本名蟬至是太宗爲
改焉淳化中轉屯田員外郎同判壽州巡撫使潘慎脩
上其政績有詔嘉獎就命知州事數月召還未上道會
丁內艱州民列狀乞留轉運使以聞有詔奪情時田重

進爲永興節度選覃與林特同判軍府事賜覃緋魚仍
賜御書歷給以實奉重進不法覃事多抗執重進頗不
悅形於辭色覃表求徙任不許就轉都官員外郎時討
李繼遷調發芻糧覃特皆以急促辦爲務覃令鉗手特
令卽械頸雖衣冠舊族不免人用怨嗟改職方員外郎
咸平初遷屯田郎中三門發運使呂蒙正在河南薦其
材詔入判三司磨勘憑由理欠司四年春旱覃上言古
之用刑皆避三統之月漢舊章斷獄報重盡三冬之月
又唐太宗凡斷重刑日勅戒膳徹樂今春物方盛時雨
尚愆輦轂之下獄繫甚繁望詔有司死罪未得論決俟

雨降乃復常典仍望自今凡決重刑日依唐故事以彰
至仁之德嘗獻時務策五篇一曰禦戎二曰用兵三曰
爲政四曰選賢五曰刑罰文多不載明年權同知貢舉
出爲陝西轉運使賜金紫會邊臣言繼遷死願乘此時
深入致討軍建議伐喪非禮且其子尚在當爲之備請
詔邊臣謹守疆候毋得輕舉俟其衆叛親離則亡無日
矣時西鄙屯兵調役甚繁副使朱台符務有爲而軍務
循舊且言邊事不宜更張初寇準知青州台符爲通判
至是準作相軍意台符憑恃僚舊密以上聞坐不協徙
知隨州王超節制漢東軍移唐州景德二年召歸屬河

北兵革之後命覃詣澶濱棣德博州巡撫振給之出知
潭州王師討宜賊軍須多出長沙曹利用以聞詔書褒
勞加刑部郎中大中祥符二年代馮亮爲淮南江浙荆
湖制置發運使月餘改太常少卿直昭文館知廣州覃
勤於吏事所至以幹濟稱南海有蕃舶之利前後牧守
或致謗議惟覃以廉著遠人便之加右諫議大夫四年
卒年五十四遣其長子奉禮郎文友乘傳赴喪詔本州
護柩還其家官給所費錄其次子敏爲揚州司士參軍
覃從弟蛻及從子侃傳並登進士弟蛻官司封員外郎
侃後名大雅自有傳

陳世卿字光遠南劍人雍熙二年登進士第解褐衡州推官再調東州節度推官會李順寇兩川知州張雍以州兵馬爲數部使官分領世卿素善射當城一面親射中數百人賊寢盛同幕皆謀圖全計世卿正色曰食君祿當委身報國柰何欲避難爲他圖耶亟出白雍曰此徒皆懦儒存之適足惑衆不若遣出求援雍從之賊旣引去世卿適丁外艱雍表其材詔追出視事就改掌書記凡七年歸朝爲祕書郎遷太常丞知新安縣或薦其堪任憲臺卽召歸會張鑑出知廣州表爲通判將行召見賜緋加太常博士景德初徙知建州真宗知其材幹

踰月授福建轉運使規畫南劍州安仁等銀場歲增課
羨詔獎之俄代姚鉉爲兩浙路轉運使歷祠部員外郎
判三司三勾院大中祥符四年改度支員外郎出爲荆
湖北路轉運使屬澧州慈利縣下溪等四州蠻人侵縣
境地四百餘里朝命世卿與閣門祇候史方知澧州劉
仁霸同領兵討之遂還所侵地標正經界取其要領又
令納所掠漢口千餘復置澧州武口等砦以控制之自
是平定有詔嘉獎還朝屢述溪洞利害召對真宗器其
材復自言願効用於煩劇會邵疇知廣州被疾乃授世
卿祕書少監代之加賜金紫郡有計口買鹽之制人多

不便至卽奏除之九年卒年六十四錄其子南安主簿儼爲太祝

李若拙字藏用京兆萬年人父光贊貝冀觀察判官若拙初以蔭補太廟齋郎復舉拔萃授大名府戶曹參軍時符彥卿在鎮光贊居幕下若拙得以就養俄又舉進士王祐典貢舉擢上第授密州防禦推官登賢良方正直言極諫科太祖嘉其敏贍改著作佐郎故事制策中選者除拾遺補闕若拙以恩例不及上書自陳執政惡之出監商州阬冶遷太子左贊善大夫以官稱與父名同辭不許太平興國二年知乾州會李飛雄詐乘驛稱

詔使事敗伏法太宗以若拙與飛雄父若愚連名疑其
昆弟命殿直盧令珣卽捕繫州獄乃與若愚同宗通家
非親不知其謀猶坐削籍流海島歲餘起授衛尉寺丞
知隴州四年復舊官以政聞超授監察御史通判秦州
同帥宋偓年老政弛又徙若拙通判焉未幾御史中丞
滕中正薦之召歸臺頃之改右補闕時諸王出閣若拙
獻頌稱旨召見賜緋魚同勾當河東轉運兼雲應等八
州事嘗詣闕言邊事太宗嘉之又同掌水陸發運司雍
熙三年假祕書監使交州先是黎桓制度踰僭若拙旣
入境卽遣左右戒以臣禮繇是桓聽命拜詔盡恭燕饗

日以奇貨異物列于前若拙一不留眄取先陷蠻使鄧君辨以歸禮幣外不受其私覲使還上謂其不辱命遷起居舍人充鹽鐵判官淳化二年出爲兩浙轉運使契丹寇邊改職方員外郎徙河北路賜金紫五年直昭文館遷主客郎中江南轉運使若拙質狀魁偉尚氣有幹才然臨事太緩宰相以爲言罷使知涇州至道二年黎桓復侵南鄙又詔若拙充使至則桓復稟命使還真宗嗣位召見慰問進秩金部郎中召試學士院改兵部郎中充史館脩撰俄知制誥咸平初同知貢舉被疾改右諫議大夫車駕北巡判留司御史臺明年使河朔按邊

事知昇貝二州四年卒年五十八子繹

繹字縱之幼謹愿自脩初以父使交趾有勞補太廟齋
郎改太常寺太祝舉進士中第除將作監丞累遷尚書
屯田員外郎知華州蒲城民李蘊訴人盜其從子亡去
繹問曰若有仇耶曰無有曰有失亡耶曰無有繹揮蘊
去因密刺蘊蘊有陰罪姪覺之懼事暴殺之以滅口遂
收蘊致法擢提點河北刑獄權知貝州歲旱繹爲酒務
市民薪草溢常數餓者皆以樵採自給得不死官入亦
數倍邊民歲輸防城火牛草十餘萬委積久輒腐敗繹
奏罷之三遷本曹郎中爲利州路轉運使河北經費不

支仁宗問誰可任者參知政事薛奎薦繹遂徙河北進
刑部郎中直史館知延州改兵部爲江淮制置發運使
內出絹五十萬匹責買於東南繹曰百姓饑不宜重擾
輒奏罷之甫半年漕課視常歲增五之一遷太常少卿
再知延州繹所至頗稱治自以久宦在外意不自得作
五知先生傳謂知時知難知命知退知足也嘗兩知鳳
翔府至是又徙鳳翔尋爲右諫議大夫卒

陳知微字希顏高郵人咸平五年進士甲科解褐將作
監丞通判歙州擢爲著作佐郎直史館俄充三司戶部
判官奉使契丹遷太常博士判三司都磨勘司再爲戶

部判官出爲京東轉運副使奏還東平監所侵民田六百八十家又決古廣濟河通運路罷夾黃河歲減夫役數萬計遷右司諫徙荆湖南路轉運使召還拜比部員外郎知制誥淮南饑遣知微巡撫所至按視儲糧察諸官吏能否使還判吏部銓兼刑部知微詞藻雖無奇采而平雅適用一日進改羣官除目紛委適當知微次直思亦敏速又判司農寺糾察在京刑獄天禧二年加玉清昭應宮判官俄以疾聞真宗遣中貴挾太醫往視之卒年五十錄其子舜卿爲太常寺奉禮郎給奉終喪又假官船載其柩還鄉里知微儀狀甚偉沉厚有材幹不

務繳察時人許其處劇惜其母老不克終養有集三十
卷子堯卿大中祥符五年進士及第

論曰維岳明習吏事才足以治劇而能曲全法掾其仁
恕藹然雍雖素稱鄙吝而勤恪清幹觀其捍守亦可見
矣儼務進黷貨廷式傾險忌刻自不容於清議若琰搏
經制漕運有方策之處事精詳治迹昭著覃之律身廉
潔兼勤吏事世卿之安遠若拙之專對皆爲時論所許
繹以謹愿克世其家知微敦實有材幹不辱其職亦可
尚也至若王陟以謹幹稱而取士以謗致汙惜哉

宋史卷三百七

宋史卷三百八

元中書右丞相總裁脫脫等修

列傳第六十七

上官正 盧斌 周審玉 裴濟

李繼宣 張旦 張煦 張佶

上官正字常清開封人少舉三傳後爲鄆州攝官雍熙

中召授殿前承旨屢遣鞠獄遷供奉官閣門祇候天雄

監軍淳化中轉作坊副使劔門都監李順之亂分其黨

趨劔門時疲兵數百人正奮勵士氣以禦之會成都監

軍宿翰領兵投劔門與正兵合因迎擊大破賊數千衆

斬馘殆盡奏至太宗嘉之詔書獎飭並賜襲衣金帶超
正爲六宅使劍州刺史充劍門部署翰自供奉官擢崇
儀使領昭州刺史數月正被疾請尋醫至闕疾愈入對
上勞問久之復遣還任所賜以金丹良藥衣帶白金十
兩馬三匹授以方略令招撫殘孽慰勉遣之初川賊甚
盛朝議深以棧路爲憂正以孤軍力戰挫賊鋒自是閬
道無壅王師得以長驅而入賊衆三百餘敗歸成都順
怒其驚衆盡斬之然自此沮氣矣後賊旣誅餘寇匿山
谷恃險結集剽劫爲患王繼恩百計召誘不至正諭以
朝廷恩信皆相率出降未幾加峰州團練使與雷有終

僉爲西川招安使代王繼恩正木彊好凌人自謂平賊
有勞受人主知無所顧忌數面攻兩川官吏之短而暴
揚之衆積怨怒多上章訴其不法者太宗謂近臣曰人
臣可任用者朕常欲保全正婞直而失於謙和每謗書
至朕雖力與明辨然衆怒難犯恐其不能自全乃賜手
札戒諭曰言者君子之樞機樞機之發榮辱之主不可
不慎也夫遇事輒發悔不可及儻自恃無瑕而好面攻
人之短豈謂喜怒不形於色耶當以和輯遠民爲念斯
盡善矣正上表謝真宗卽位改莊宅使是秋廣武叛卒
劉盱嘯聚數千輩逐都巡檢使韓景祐略漢蜀邛州懷

安永康軍正與鈐轄馬知節領兵趨新漢抵方井擊敗之斬盱平其黨遷南作坊使賜錦袍金帶咸平初召還擢拜東上閣門使勾當軍頭引見司俄權戶部使二年出知滄州徙高陽關副都署真拜洺州團練使車駕北巡以爲行營先鋒鈐轄尋知青州未行會王均叛屬命爲峽路都鈐轄移知梓州又歷滄瀛鎮貝四州高陽關部署以足疾求知磁州手詔慰勉會邢州地震民居不安徙正典之移潞州景德中以河北新經兵革慎擇守臣以正知貝州遷洺州防禦使復知滄州移同州再表引年授左龍武軍大將軍平州防禦使分司西京尋以

本官致仕賜全俸仍以見緡給之四年卒年七十五子
璨至內殿崇班

盧斌開封人以筆札事晉邸太宗卽位補殿直雍熙中
領兵屯霸州會大舉北伐令以五千騎隨曹彬抵祁溝
時契丹據河王師乏水斌請以千弩斫砦契丹遁去遂
移軍夾河旣克涿州令斌以萬人戍守會食盡大兵將
還斌因懇言涿州深在北境外無援兵內無資糧丁籍
殘失守之無利今若還師必須結陣而去以一陣之役
比於固守其利百矣復慮遼人乘便剽襲宜爲之備彬
以爲然遂令斌擁城中老幼並狼山南還易州彬之旋

也無復行伍果爲契丹所乘諸將皆以失律被譴斌亦
下樞密院問狀太宗聞其嘗建議棄涿州遂釋不問以
爲霸州破虜軍緣邊巡檢端拱中又爲永興軍華州巡
檢時大賊侯和尚劉渥劫興平櫟陽殺捕賊官二人斌
率兵掩襲且追且鬪薄南山渡渭水抵鳳翔復至耀州
擒斬並盡以勞改供奉官召還面加獎慰授閣門祇候
又賜白金緡錢衣帶尋爲梓遂十二州都巡檢使太宗
諭之曰川陝人情易搖設有寇攘雖他境亦當襲逐仍
許便宜從事不須中覆淳化二年賊任誘等寇昌合州
斌率兵頓昌州南牛鬪山偵知賊在龍水鎮值大雨斌

馳馬四十里騎從數十人遂斬誘等百餘級賊衆悉平
三年富順監蠻掠榮州斌晨夜倍道以赴得州兵千人
署隨軍糧料以張其勢蠻乃遁追至地頭鎮東南八十
里樹柵招其酋甫羗一阿奴綱諭以朝旨歆血刻石爲
盟而遣之俄而榮戎資州富順監賊十五隊鈔鄉邑斌
擒三百人部送闕下餘悉臨敵斬戮四年賊王盡復起
榮資斌擊滅之盡縛以獻遷內殿崇班是冬李順爲亂
斌卽率兵六百抵成都鬪戰連月殺數萬人明年成都
不守斌還梓州集十州兵赴援知州張雍委以監護之
任會江水汎溢毀子城斌勸諭州民翌日畚鍤大集自

城西大濠中掘塹深丈決西河水注之以環城二月賊渠相里貴衆二十一萬傅城下城中兵裁三千斌曰軍法倍兵不戰然狂醜烏合非訓練之師以吾仗天子威靈必可殲蕩卽感厲士伍負土塞南北門爲固守之計又突出與賊戰擊刺三十餘合賊稍却俄復大設機石連弩衝車雲梯四面鼓譟乘城矢石亂下斌與州將隨機設備長圍八十日會王繼恩令石知顛率兵來援斌出東門迎勞王師賊不戰而潰斌乘勝追斬及納降二萬餘五月賊數萬圍閬州斌領千兵赴之斬首五千圍遂解又至蓬州老雅山賊衆三千爲陣拒斌斌擊敗之

至城下賊復大集斬三千級蓬州平斌傳詔安撫蓬聞渠達四州擢授西京作坊使領誠州刺史斌在川陝六年以孤軍禦寇累立戰功表求入奏太宗遣使諭之曰俟妖孽盡殄當召汝旣而賊黨集梓緜漢三州境上斌往平之未幾代還太宗親加勞問拜東上閣門使檢校左僕射加食邑三百戶賜白金千兩袍笏金帶上言葭萌路出師討賊可直入利州若寇焚棧道劔門之險不足固也請置砦柵從之尋命爲銀夏兵馬鈐轄遣與李繼隆等五路出師討李繼遷斌求對懇言曰羗夷之族馬驕兵悍往來無定敗則走他境疾戰沙漠非天兵所

利不若堅保靈州於內地多積芻糧以師援送苟其至也會兵首尾擊之庶幾無枉費而不失固圍之策矣時業已出師不從其議改授靈環路鈐轄領兵二萬爲前鋒令於烏白池與諸軍會弒謂李繼隆曰靈州抵烏白池月餘方至若自環州橐駝路裁十日程卽不俟詔而往與諸將失期不見賊而還俄徙屯寧州以疾召歸勾當軍頭引見司咸平初卒年五十子文質殿中丞

周審玉開封人父勳以親校事唐明宗累立戰功太平興國中至隰州團練使周顯德初審玉蔭補殿直從世宗平瓦橋關甚見親信太祖受禪爲供奉官未幾加閣

門祇候累遷崇儀洛苑副使西京作坊使雍熙中契丹犯塞潘美屯師定州審玉爲監軍嘗與敵戰而先鋒劉緒陷賊審玉躍馬趣擊拔緒而還以勇敢聞淳化中知貝州有驍捷卒戍州者三十七人同謀殺審玉劫庫兵而叛推虞候趙咸雍爲首審玉覺之與轉運使王嗣宗率兵悉擒其黨斬十五級磔咸雍於市先是咸雍父鱗晉天福中嘗誘契丹屠州城至是五十年而其子戮於都市舊老猶記其事咸異之審玉以功領順州刺史至道初徙并州鈐轄威平初知鳳翔府有桑門乘傳而西以市木爲名威動府縣審玉曰此有所倚而爲也因按

宋史卷三百八 列傳
一八
詰之盡得其姦狀杖其背械送闕下以目疾代還奉朝
請俄丁內艱旣而謂親友曰僕齒髮遲暮而未能辭祿
仕者良以慰母心爾今可行其志矣乃拜章請老得千
牛衛大將軍致仕三年卒年七十四審玉晚年好讀神
農本草留意方術少長兵間習知攻守之法真宗嘗召
至便坐示以攻戰器方奏對疾作詔遣使就第賜白金
慰恤之子允迪爲虞部員外郎

裴濟字仲溥絳州聞喜人唐相耀卿八世孫後徙家河
中濟少事晉邸同輩有伎悍者濟屢糾其過失被譖出
補太康鎮將未幾譖濟者坐法太宗知濟可任會卽位

補殿直爲天威軍兵馬監押及平太原征幽薊濟迎謁
陪扈令監軍易州契丹攻城不能下以勞遷西頭供奉
官太平興國末江表盜起命爲巡檢遷崇儀副使召還
遷崇儀使監戍兵於威虜軍塗次鎮州夜有賊騎扣城
門大呼曰官軍至矣州將然之促守吏開關濟遽止之
曰此必妄也及旦果有敵兵遯去太宗嘉之遷西上閤
門使定州都監就加行營鈐轄尋知定州契丹三萬騎
來攻濟逆擊於徐河斬數千級獲牛馬鎧仗甚衆淳化
初與周瑩同判四方館未幾爲鎮州行營鈐轄又與李
繼隆擊賊於唐河濟短兵陷陣賊大敗走優詔褒美初

續隆以濟性剛不悅之及是役撫濟恨相知之晚改四方館使復知定州徙天雄軍鈐轄遷客省使復知定州至道二年改內客省使知鎮州立春日出土牛以祭酌奠始畢有卒挾牛去濟察其舉止知欲爲變亟命擒之果有竊發者數十人已刼鄜間矣悉蒐捕腰斬之軍民肅然濟在鎮定凡十五年威績甚著召還知天雄軍咸平初李繼遷叛以濟領順州團練使知靈州兼都部署至州二年謀緝八鎮興屯田之利民甚賴之其年清遠軍陷夏人大集斷饜道孤軍絕援濟刺指血染奏求救甚急兵不至城陷死之上聞嗟悼特贈鎮江軍節度三

子並優進秩濟在諸使中甚有聲望及沒夏人皆惜之
景德中濟妻永泰郡君景氏卒特詔追封平陽郡夫人
諸子給奉終喪子德谷虞部郎中德基至如京使德豐
殿中丞濟兄麗澤弟麗正並進士及第麗澤至右補闕
麗正至金部員外郎麗正子德輿爲殿中丞

李繼宣開封浚儀人乾德中補右班殿直令與御帶更
直裁十七歲命往陝州捕虎殺二十餘生致二虎一豹
以獻太平興國初掌南作坊使改供奉官出爲邠寧慶
三州巡檢都監繼宣本名繼隆與明德皇后兄同姓名
至是太宗爲改焉五年召還承受定州路奏事奉詔脩

長城口平塞威虜靜戎軍保州又領兵入敵境獲老幼千餘牛畜數百又率兵扞契丹于乾寧泥姑海口契丹寇靜戎軍從崔彥進過拒馬河接戰自午至申大敗之又爲貝州監軍雍熙三年曹彬北征繼宣從先鋒李繼隆至方城力戰三日大軍繼至遂克固州進壁涿州東又與敵鬪乘勝攻北門克之日領輕騎渡涿河覘敵勢又將五千騎援米信因率勁騎追至新城北大敗之斬其酋賀恩相公繼宣亦中流矢大軍還雄州取芻糧遇契丹新城疾戰至暮繼宣中十劒及堯鑿明日復戰繼隆爲敵所邀繼宣以所部拔之且戰且行奪涿河數

日乃至涿州及棄州保岐溝關又戰拒馬上追奔至孤山契丹乃引去留屯滿城俄還貝州召入以功超授崇儀使代王繼恩爲易州駐泊都監賜錢五十萬白金五百兩又領騎兵五千戍北平押大陣東偏受田重進節度屯長城口敵至大溝繼宣進滿城敵至定州奪唐河橋重進召繼宣泊田紹斌赴援紹斌爲敵所敗繼宣獨按部轉鬪入定州敵兵北去重進命將五千騎躡其後抵拒馬河及敵據楊疇繼宣徑掩擊之遂焚廬舍而遁雍熙四年爲高陽關行營都監端拱初契丹騎至瀛鎮繼宣率步騎萬人入敵境抵勝務焚聚落獲生口契丹

乃引還時易州候騎不至繼宣於易州平塞軍長城口
威虜靜戎順安軍至高陽爲望櫓七所舉烽以候警急
二年爲鎮定高陽關三路排陣都監押大陣西偏與李
繼隆部芻糧抵威虜還度徐河爲敵追襲繼宣駐軍與
鬪殺獲甚衆又領騎二千敗契丹於保州西射城追薄
西山有詔褒美淳化三年徙知保州又轉莊宅使築關
城浚外濠葺營舍千五百區造船一百艘入雞距泉以
運糧人咸便之數月徙定州行營都監戍深州改高陽
關行營都監課軍中勁弩爲入陣之備五年領高州刺
史會契丹泛海劫千乘縣繼宣請於海口置砦以禦之

至道三年遷北作坊使俄召還加南作坊使出爲鎮州
行營鈐轄契丹寇定州命主無地分馬敵至懷德橋繼
宣領兵三千掩襲之至則契丹已壞橋繼宣橫木而度
追奔五十餘里契丹焚鎮州中渡常山二橋繼宣領兵
趣之契丹保豐隆山砦繼宣伐木治常山橋契丹聞之
大懼拔砦遁走繼宣銳於追襲傅潛爲部署繼宣詣潛
請行頗爲所抑及召潛屬吏詔繼宣與高瓊同主軍事
逐敵越拒馬河復爲鎮州鈐轄受詔按視緣邊城砦權
知威虜軍敵騎至城下屢出兵設伏斬獲甚衆俄還鎮
州咸平四年拜西上閣門使領康州刺史爲前陣鈐轄

與秦翰楊延昭楊嗣分屯靜戎威虜敵至會師于威虜
延昭嗣輕騎先赴羊山繼宣與翰分左右隊各整所部
翰全軍亦往繼宣留壁赤虜止以二騎繼進至則延昭
嗣適爲敵所乘繼宣卽召赤虜之師與翰師合勢大戰
敵走上羊山繼宣逐之環山麓至其陰繼宣馬連中矢
斃凡三易騎進至牟山谷大克捷延昭嗣翰之師初頓
赤虜旣而退保威虜繼宣以所部獨與敵角薄暮始至
威虜詔書稱獎特加檢校官及食邑明年徙定州鈐轄
扞契丹于唐河會緣邊都巡檢使楊延昭楊嗣禦敵師
敗詔繼宣與內殿崇班王汀代之望都之敗敵騎剽郡

縣繼宣壁徐河契丹數十隊薄威虜威虜魏能與戰走
之久而繼宣始至又寇靜戎汀請分兵自將襲契丹繼
宣拒之雖日出遊騎偵敵勢屢徙砦而未嘗出戰爲能
汀所發召還令樞密院問狀降爲如京副使景德初加
如京使鎮州鈐轄契丹乘秋來攻時桑贊病足鄭誠赴
定州繼宣獨主鎮州全師歷屯邢趙及與契丹和命爲
高陽關鈐轄是冬復爲西上閣門使領康州刺史三年
兼知瀛州繼宣罕識字上以河間郡事繁慮獄訟有枉
命高繼勳代之止爲鈐轄大中祥符初徙鎮定兩路鈐
轄進秩東上閣門使召還改鄆州部署加四方館使以

疾授西京水南都巡檢使每夕罕巡警爲留司所舉特
詔增巡檢一員專主夜巡六年疾甚求至京師尋醫卒
年六十四子守忠左侍禁閣門祇候

張旦趙州人勇敢善射以經學中第至國子博士淳化
中知陵州時李順構亂連下城邑賊黨數萬攻陵州州
兵不滿三百舊不設城塹旦修完戰具置鹿角砦驅市
人進戰大敗之殺五千餘人獲器械萬計詔書褒之特
遷水部員外郎賜緋魚由是知名數月西川招安使上
官正言雅州密邇蠻蠻在於鎮撫須得其人伏見水部
員外郎張旦前守陵州以孤軍抗羣寇保全壁壘至今

劔外伏其威名望改授諸司使令知州事上以省郎之重不欲換他職乃授刑部員外郎賜金紫乘傳之任寇不敢犯真宗卽位遷兵部員外郎改尚食使知德清軍景德中契丹入寇陷軍壁旦與其子利涉率衆奮擊金戰没上聞之驚悼特贈左衛大將軍深州團練使利涉崇儀副使錄其四子官時有上封事者言朝廷宜優加恩典以勸忠臣詔以恤旦事告諭天下又虎翼都虞候胡福戍軍城率兵力戰金創徧體猶奮劔轉鬪矢無虛發麾下已盡獨挺刃殺數十人副指揮使尚祚能運大撾所斬首拉脅者亦百餘人衆寡不敵遂與指揮使張

睿劉福都頭輔能等四人並死之真宗嘉歎其忠勇遣使訪遺骸唯得福尸命其子厚葬之贈福洺州團練使祚濱州刺史睿濱州刺史劉福臨州刺史能等並贈諸衛率府副率又邯鄲令李晦辭赴任值道梗留德清同拒敵侍禁夏承皓部兵至大名界遇敵皆戰沒贈晦辭工部員外郎承皓崇儀使時又贈受事河朔而沒者殿直劉超供備庫使入內高班內品李知順爲六宅副使奉職胡度等三人爲內殿崇班仍各錄其子及賜其家

金帛

張煦字輔暘開封人開寶末補府中牙職雍熙二年自

陳太宗尹京嘗事左右命爲殿前承旨遷殿直歙州監軍兇人黃行達弟坐法抵死行達誣州將故入其罪詔宣州通判姚鉉與煦鞠之卽日決遣還擢供奉官閣門祇候占謝日又改內殿崇班鎮定邢趙山西土門路都巡檢使契丹騎兵剽境上煦以所部斬首數十走之葛霸周瑩李繼宣稱其幹舉有詔嘉獎代還拜供備庫副使權知環州數月改岢嵐軍使又知保安軍咸平中王均亂蜀以煦爲綿漢劔門路都巡檢使又與雷有終進攻成都煦主東砦焚其郭及樓堞均突圍而遁賊平以功就遷正使徙益州都監與知州宋太初同提總本路

諸軍事有戰艦卒將謀擾動煦卽日斬之夏人寇邊改涇原儀渭都鈐轄又爲邠寧環慶路鈐轄兼巡檢安撫都監累躡寇入賊中掩殺甚衆有詔嘉獎會遣王超張凝秦翰援靈武命煦爲西路行營都監至鎮戎聞靈武已陷復還本任與張凝入西夏境出白豹鎮至柔遠川夏人七百餘邀戰煦與慶州監軍張綸擊殺甚衆清遠故城有酋長請以甲騎三萬來降煦與凝曰此詐也亟嚴兵以待之果然凝按部歸環州道爲敵所邀煦聞之領所部銳兵自慶州赴之一夕與凝會射殺其大將與凝同還景德元年加領賀州刺史復爲涇原儀渭鎮戎

軍鈐轄再知環州四年宜州戍卒陳進反命副曹利用
爲廣東西路安撫使賊衆擁判官宜州盧均僭號南平
王圍象州煦以兵會利用斬之初與利用同署紙人持
百枚備給立功將士及破賊利用在前軍無所給煦在
後而所給過半真宗謂其太過賊平改如京使知懷州
東封歲權河陽鈐轄遷文思使知曹州會江淮災歉分
命大藩長吏綏撫以煦爲江南西路安撫都監俄還濟
陰加北作坊使又徙滄州就轉宮苑使領康州刺史大
中祥符九年加領昭州團練使知鄜州未幾復知滄州
天禧三年拜西上閣門使徙并代鈐轄以老疾求近郡

宋史卷三百八 列傳
十四
得知磁州四年卒年七十三
煦明術數善相宅時稱其
妙

張佶字仲雅本燕人後徙華州渭南初名志言後改焉
父昉殿中少監佶少有志節始用蔭補殿前承旨以習
儒業獻文求試換國子監丞遷著作佐郎監三白渠知
涇陽縣端拱初爲太子右贊善大夫曹州民有被誣殺
人者詔往按之發擿姦伏寃人得雪尋通判忻州遷殿
中丞兼御河督運至道中通判陝州再部送芻糧赴靈
武就改國子博士咸平初擢爲陝西轉運副使賜緋魚
至延安遇夏人入寇親督兵擊敗之三年徙西川轉運

副使時詔討王均以餽餉之勞遷虞部員外郎賊平分川陝爲四路以佶爲利州路轉運使有薦其武幹者召還授如京使涇原鈐轄兼知鎮戎軍徙麟府路鈐轄夏人來寇佶率兵與戰親射殺酋帥俘獲甚衆餘黨遁去詔書褒之賜錦袍金帶景德中徙益州鈐轄加宜州刺史遷文思使佶御軍撫民甚有威惠蜀人久猶懷之大中祥符四年車駕祀汾陰以爲西京舊城巡檢鈐轄禮成加授北作坊使充趙德明官告使又爲鄜延鈐轄會秦州李濬暴卒上語近臣曰天水邊要宜速得人馬知節稱佶可任上然之遂改驥驥使就命知秦州至州置

四門若開拓疆境邊部頗怨又臨渭置采木場戎人不
之爭移帳而去佶不甚存撫亦不奏加資賜邊人追悔
引衆劫掠佶深入掩擊敗走之議者又欲加恩宗哥立
遵等族以扼平夏佶請拒絕之事具吐蕃傳朝廷始務
寧邊以佶輕信易事徙邠寧路鈐轄天禧初召爲契丹
國信副使再任邠寧兼知邠州遷宮苑使未逾月擢拜
西上閣門使復爲涇原鈐轄四年卒年六十九佶涉獵
書史好吟詠勇敢善射有方略其總戎護塞以威名自
任子宗象兵部員外郎直史館度支判官

論曰自古盛德之世未嘗無邊圉之患要在得果毅之

臣以扞禦之昔人有言誰能去兵漢祖亦云安得猛士
蓋爲此也李順叛蜀攻陷郡邑正扞劔門斌守梓潼其
績最多契丹入寇審玉繼宣拔陷將於重圍之中固有
餘勇佶煦宣力西南勤幹威惠亦皆可取濟旦以孤城
扞強寇援絕戰死一代死事之表表者其可泯諸

宋史卷三百八